

ILIDŽA



INFORMATIVNI BILTEN
OPĆINE ILIDŽA
BROJ 197



SADRŽAJ

Osvježena sala za borilačke sportove Bolji uslovi za ilidžanske klubove	4
Isplaćene štete prouzrokovane poplavama Fizičkim licima Općina isplatila više od 500.000 KM	6
Iz Hrasnice na Igman žičarom Podržana Odluka o utvrđivanju javnog interesa za izgradnju	9
Obilježen Dan nezavisnosti Bosne i Hercegovine 30. godišnjica od historijskog Referenduma	11
Raspisan tender za izvođača radova Tramvajska pruga na relaciji Ilidža - Hrasnica	15
Odbojkaši Ilidže izabrali Premijer ligu BiH Ostvarili historijski rezultat	16
Usvojen rekordni Rebalans Budžeta Općine Ilidža 64 posto otpada na kapitalne projekte	20
Treća posjeta Erika Larsona Općini Ilidža Pohvale savjetnika za borbu protiv korupcije	23
Obnavlja se ratni put preko Igmana Historijski projekt za Ilidžu i Kanton Sarajevo	26
Općina Ilidža i KULT podrška mladima Objedinili sredstva i tako udvostručili izdvajanja	27
50.000 KM za Memorijalni centar Srebrenica Sredstva planirana u Budžetu Općine Ilidža za 2022. godinu	30
Velika akcija čišćenja Ilidže Prikupljeno 150 tona različitog otpada	31
Besplatne knjige za ilidžanske osnovce Za učenike od prvog do četvrtog razreda	35



Adnanu Šteti Zlatna plaketa



Spektakularno otvaranje obnovljenog izletišta Stojčevac



Usvojena Strategija razvoja Općine Ilidža 2022. - 2027.



Ilidža dobija moderni park za mlade, sadržaj kakav do sada nije imala

IMPRESSUM

Izdavač: **Općina Ilidža**
Butmirska cesta 12
71210 Ilidža
info.desk@opcina-ilidza.ba
+38733775600



www.opcinailidza.ba

Pripremio: **Dino Stambolić**

Osobe na stručnom osposobljavanju:
Azra Sinanbašić
Mahir Kustura

DTP: **Dino Stambolić**

Štampa:
Grafičar promet d.o.o.

Tiraž: **5.000**





RIJEČ NAČELNIKA

Nakon 2021. godine u kojoj smo se pored borbe sa koronavirusom suočili i sa nezapamćenim poplavama na području općine Ilidža, 2022. godinu smo počeli saniranjem i isplatom šteta našim građanima čija je imovina nastradala.

Na osnovu procjene Komisije za procjenu šteta, našim sugrađanima je isplaćeno više od pola miliona konvertibilnih maraka. Skoro istovremeno osigurali smo i sredstva od Kantona Sarajevo kako bi se izvršila eksproprijacija zemljišta u najproblematičnijem dijelu korita rijeke Željeznice, u naselju Otes. Na taj način smo jedan težak period ostavili iza sebe i sa čvrstom voljom počeli u djelo sprovoditi kapitalne projekte koje smo najavili krajem prošle godine. Rekordni Rebalans Budžeta, koji je rezultirao povećanjem sredstava za kapitalne projekte sa 50% na 64%, još više je doprinio spremnosti da se vizija koju smo zacrtali počne i ostvarivati.

Prvi projekt koji smo započeli je sanacija poznatog ilidžanskog ali i sarajevskog izletišta Stojčevac. Radovi su obuhvatili zamjenu starog asfalta novim, uklanjanje otpada, rezidbu vočki te uređenje cijelog lokaliteta. Već u junu su se stvorili uslovi za održavanje sjajne sportsko-zabavne manifestacije. Općina Ilidža je u saradnji sa JU KSIRC Ilidža i SRK Dami organizovala humanitarnu trku Stojčevac 5K i koncert Harija Mata Harija. Ovi događaji, kojima je i zvanično otvorena ljetna turistička sezona u Kantonu Sarajevo, na Stojčevac su privukli više od 20.000 ljudi.

Započeli smo i projekt rekonstrukcije ratnog puta preko Igmana, koji je historijski gledano najvažniji zbog uloge koju je ova putna komunikacija imala tokom agresije na Bosnu i Hercegovinu, a radovi na putu dužine 2.965 metara trebali bi biti okončani u naredne tri godine.

Raspisan je i tender za izvođača radova za izgradnju tramvajske pruge na relaciji Ilidža - Hrasnica, te smo na taj način došli korak bliže realizaciji i ovog višedecenijskog projekta, dok je Općinsko vijeće Ilidža podržalo Odluku o utvrđivanju javnog interesa za izgradnju kabinske žičare Hrasnica - Igman.

Već na samom startu građevinske sezone asfaltirali smo brojne saobraćajnice na području naše lokalne zajednice. Pojedine su obnovljene, a neke su po prvi put dobile asfalt.

Sa Direkcijom za puteve Kantona Sarajevo potpisali smo Sporazum o pokretanju javne nabavke za izgradnju kružnog toka u Butmiru, a počeli su i radovi na velikom Sportsko-rekreativnom parku za djecu i mlade koji će biti smješten na 12.000 kvadratnih metara na desnoj obali rijeke Željeznice.

Organizovali smo i jednu od najvećih poslijeratnih akcija čišćenja i uređenja javnih površina na području općine Ilidža u kojoj je za pet dana prikupljeno više od 150 tona otpada, a kroz projekt nužnih popravki i utopljanja sanirani su krovovi i fasade na nekoliko zgrada kolektivnog stanovanja. Usudim se

reći mnogo više nego za cijelu proteklu deceniju.

Iz oblasti privrede, podržali smo poljoprivrednu djelatnost kroz dodjelu zemljišta na privremeno korištenje za proljetnu sjetvu kao i kroz dodjelu plastenika.

Nismo zaboravili ni na boračku populaciju koju smo podržali za programske i projektne aktivnosti u ukupnom iznosu od 310.000 KM, dok smo za projekte iz oblasti kulture, sporta i obrazovanja izdvojili 455.600 KM.

Općina je kroz partnerstvo sa Institutom za razvoj mladih KULT udvostručila sredstva namijenjena implementaciji projekata za mlade (60.000 KM).

Podršku mladima iskazali smo i kroz saradnju sa direktorima osnovnih škola sa područja općine Ilidža, a ponovo smo osigurali sredstva za nove besplatne članarine u JU Ustanovi Biblioteka Sarajeva.

S ponosom mogu reći da smo prva općina u Kantonu Sarajevo koja je pratila odluku Vlade KS za besplatne udžbenike učenicima od petog do devetog razreda, pa smo tako osigurali besplatne udžbenike za osnovce od prvog do četvrtog razreda.

Kroz Javni poziv dodijeljena su i sredstva humanitarnim i neprofitnim organizacijama u iznosu od 50.000 KM.

Tokom 2022. godine započeti su brojni projekti koji podupiru našu viziju Ilidže kao mjesta gdje izvire život, stanuje zdravlje i živi znanje, što je ujedno i suština Strategije razvoja općine Ilidža koju je usvojilo Općinsko vijeće, a koju planiramo implementirati do kraja 2027. godine.

U narednom periodu nastavljamo istim tempom kako bi se započeti projekti uistinu realizovali, ali i krenuli radovi na novim projektima.

Naš fokus će i u budućnosti biti usmjeren ka unapređenju konkurentnosti i samoodrživosti lokalne privrede, kvalitete društvenog života i odgovornog upravljanja okolinom i razvojem infrastrukture.

Puno posla nas čeka, a projekti na kojima se počelo raditi su tek uvod u ono što slijedi. Radujem se svakom koraku koji će našu Ilidžu učiniti ljepšom i boljom za život.

Vaš načelnik,



Načelnik Nermin Muzur posjetio trening kluba sa Grbavice

POMOĆ VELIKANU: OPĆINA ILIDŽA SNOSILA DIO TROŠKOVA PRIPREMA FK ŽELJEZNIČAR



Načelnik Muzur u razgovoru sa Edisom Mulalićem, šefom stručnog štaba Željezničara

Načelnik Općine Ilidža Nermin Muzur krajem januara ove godine posjetio je trening-utakmicu Fudbalskog kluba Željezničar, koji se za nastavak sezone pripremao u trening-kampu FK Igman na Ilidži.

Nezavidnu situaciju u kojoj se nalazi klub s Grbavice, Općina Ilidža željela je koliko-toliko olakšati, zbog čega je preuzela dio troškova priprema koje je Željko obavio na Ilidži.

- Iako sam strastveni navijač FK Sarajevo, posjetio sam trening Željezničara, a Općina Ilidža snosit će troškove dijela priprema koji je obavljen na našoj Ilidži - rekao je načelnik Općine Ilidža Nermin Muzur.

Načelnik Muzur je naglasio da je posebno ponosan na činjenicu da se dva najveća bosanskohercegovačka fudbalska kluba pripremaju na teritoriji općine Ilidža, aludirajući na to da Fudbalski klub Sarajevo već godinama unazad u Butmiru ima svoj trening-kamp.

Općina Ilidža čest je domaćin velikih sportskih događaja, ali i mjesto okupljanja naših reprezentativnih selekcija, pogotovo kada je riječ o timskim sportovima.

- Kroz planirane projekte u skorijoj budućnosti nastojat ćemo poboljšati sportsku infrastrukturu u našoj lokalnoj zajednici i učiniti je sportskom oazom - poručio je Muzur.

Bolji uslovi za ilidžanske sportiste u dvorani "Sabit Hadžić" Kulturno sportskog i rekreacionog centra Ilidža

OSVJEŽENA SALA ZA BORILAČKE SPORTOVE

Javna ustanova Kulturno sportski i rekreacioni centar Ilidža obnovila je salu za borilačke sportove koja se nalazi u sastavu dvorane KSiRC "Sabit Hadžić". Kako su istakli iz JU KSiRC Ilidža na ovaj potez odlučili su se kako bi klubovima borilačkih sportova poboljšali uslove trenažnog procesa.

- U nastojanju da ilidžanski klubovi i njihovi članovi nastave s dobrim rezultatima, uz želju da poboljšamo trenutne uslove rada i trenažnog procesa, Uprava JU "KSiRC" Ilidža odlučila je da se krene u postupak rekonstrukcije sale za borilačke sportove - kazao je Haris Topalović, direktor ove ustanove.

U prošlosti su u ovoj sali rasli i trenirali istinski šampioni, a Topalović ističe da to najbolje potvrđuju rezultati koje ostvaruju.

- Naši korisnici rezultatima na državnim i međunarodnim takmičenjima predstavljaju Ilidžu na najbolji mogući način, ali i potvrđuju da zaslužuju bolje uslove za trenažni proces - naglasio



Haris Topalović, direktor KSiRC Ilidža

je Topalović, te dodao:

JU KSiRC Ilidža aktivno radi i na obnovi svlačionica, rekonstrukciji krova, nadogradnji fitness centra, ali i drugih prostorija koje su sastavni dio dvorane "Sabit Hadžić".

Borba protiv nasilja nad djevojčicama i ženama u Bosni i Hercegovini

OPĆINA ILIDŽA PRIDRUŽILA SE INICIJATIVI JA #NOSIMNARANDŽASTO ZA...



Svaka druga žena starija od 15 godina u Bosni i Hercegovini doživjela je neki oblik nasilja

Općina Ilidža pridružila se inicijativi "Ja #nosimnarandžasto za..." koju je pokrenuo Institut za razvoj mladih KULT, s kojim Općina ima odličnu saradnju, a u cilju podrške i ohrabrenja svim ženama i djevojčicama žrtvama nasilja.

Prema istraživanju Agencije za ravnopravnost spolova u Bosni i Hercegovini i OSCE-a svaka druga žena starija od 15 godina u Bosni i Hercegovini doživjela je neki oblik nasilja.

U prvih sedam mjeseci 2020. godine, broj prijema u sigurne kuće porastao je za 50%, a broj poziva na SOS linije za 47%.

Ovi podaci jasno pokazuju da je borba protiv nasilja nad ženama i djevojčicama daleko od gotove, te da cjelokupno društvo, bez izuzetaka, mora dati svoj doprinos u borbi. Veliki broj slučajeva nasilja ostane nezabilježen - djevojčice i žene iz različitih kulturoloških razloga, straha, ekonomske ovisnosti i stigme ne prijavljuju nasilje.

Odlukom generalnog sekretara UN-a svaki 25. u mjesecu obilježava se kao Narandžasti dan - dan borbe protiv nasilja nad ženama i djevojčicama.

Dan posvećen borbi protiv rodno zasnovanog nasilja, podiže svijest o važnosti sprečavanja nasilja, ali isto tako jasno poručuje da se svi moramo uključiti u prevenciju nasilja kroz edukaciju i informisanje djece i mladih, a potom i sprječavanje i adekvatno prijavljivanje slučajeva nasilja.

Svaka druga žena starija od 15 godina doživjela je neki oblik psihičkog, ekonomskog ili fizičkog maltretiranja.

Nažalosti, manje od 20% žena u Bosni i Hercegovini usudi se potražiti bilo kakvu pomoć.

I ne zaboravite - upravo ovakve inicijative mogu žrtvu ohrabriti da izađe iz nasilja i promijeniti joj život.



50 "zvona" je postavljeno na frekventnim mjestima

U protekloj godini na području općine Ilidža

PRIKUPLJENO 115% VIŠE STAKLENE AMBALAŽE NEGO U 2020. GODINI

Na području općine Ilidža prikupljeno je čak 115% više staklene ambalaže nego u 2020. godini kroz regionalni projekt "Upravljanje staklenom ambalažom na Zapadnom Balkanu" koji se u Bosni i Hercegovini implementira u Bihaću, Novom Travniku, Konjicu i na Ilidži. Na reciklažu je predato više od 150 tona staklene ambalaže, što je za 27% više nego u 2020. godini, a građani Ilidže prikupili su više od tri tone staklene ambalaže u protekloj godini. U sklopu ovog projekta 50 "zvona" za odlaganje staklenog otpada postavljeno je na frekventna mjesta na području naše općine.

Općina uručila rješenja za 125 osoba koje su ostvarile pravo na isplatu šteta u poplavama iz novembra 2021.

ZA ŠTETE U POPLAVAMA FIZIČKIM LICIMA ISPLAĆENO VIŠE OD POLA MILIONA KM



Obeštećeni su svi koji su u periodu od 5. do 15. novembra 2021. godine uredno prijavili štete nastale u poplavama

Načelnik Općine Ilidža, Nermin Muzur, naglasio je kako procijenjene štete za razliku od ranijih godina nisu isplaćivane linearno, već su bile u rasponu od 500 pa do nekih 20.000 KM

Načelnik Općine Ilidža Nermin Muzur građanima Ilidže uručio je rješenja za isplatu šteta koje je u novembru 2021. godine prouzrokovala nezapamćena poplava.

- Maksimalno smo se potrudili da pomognemo svim fizičkim licima koja su pretrpjela štetu, u skladu sa zakonom. Komisija je izašla na teren, izvršila procjenu, Općinsko vijeće je donijelo odluku i uslijedila je realizacija. Nadam se da više nećemo doći u ovu situaciju - kazao je Benjamin Mešak, pomoćnik načelnika za finansije.

Načelnik Općine Ilidža Nermin Muzur naglasio je kako je Općina uložila velike napore kako bi maksimalno pomogla građanima.

- Potrudili smo se da u odnosu na neko ranije vrijeme pokažemo da je Općina Ilidža vaša općina i da smo mi sa svima vama, koje je, nažalost, zadesio ovaj problem, te da vam pokušavamo pomoći da ga što lakše prebrodite - rekao je načelnik Muzur.

Za razliku od nekih ranijih godina, kada je zbog posljedica poplava odlukama linearno isplaćivana šteta u rasponu od 500 do 1.000 KM, ovoga puta građanima su isplaćene štete na osnovu onoga što je utvrdila Komisija za procjenu šteta.

- Uradili smo nešto od čega nismo bježali. Proglasili smo stanje prirodne nepogode da bi mogli povući sredstva iz Civilne zaštite i da bi mogli obeštetiti naše građane. Donijeli smo odluku da prvo obeštetimo fizička lica, a onda, ukoliko ostane novca, i privredna lica - kazao je načelnik Muzur.

Važno je naglasiti da je novac za svih 125 osoba, koje su ostvarile pravo na isplatu štete nastale u poplavama, isplaćen istog dana kada su im uručena rješenja. Na ovaj način Općina Ilidža je s više od pola miliona konvertibilnih maraka obeštetila

građane čija je imovina nastradala u poplavama, a koji su u periodu od 5. do 15. novembra 2021. godine uredno prijavili štete.

Načelnik Muzur zahvalio se i općinama koje su finansijski pomogle Općini Ilidža u isplati šteta. Općina Centar dodijelila je Ilidži 30.000 KM, Općina Trnovo 25.000 KM, a Općina Kalesija 5.000 KM.

Određene korake, zahvaljujući kojima će se u budućnosti smanjiti rizik od poplave kakva se desila krajem prošle godine, Općina Ilidža je već napravila.



Sa potpisa ugovora

- Poduzeli smo niz radnji vezanih za saniranje i uređenje riječnih korita. Osigurali smo 800 hiljada KM od Kantona Sarajevo kako bi izvršili eksproprijaciju zemljišta u Otesu u prvih 300 metara na dijelu korita rijeke Željeznice koji je najproblematičniji. Iskreno se nadam da ćemo ove godine uspjeti "natjerati" Agenciju za vodno područje rijeke Save da krene sa uređenjem dijela korita u Otesu koji je najugroženiji. Osim toga, imamo i jedan dio Tilave, čijem uređenju ćemo vjerovatno pristupiti ove godine - rekao je načelnik Muzur.

Obilježena jedna od najvažnijih operacija tokom Narodno-oslobodilačkog rata

80. GODIŠNJICA IGMANSKOG MARŠA



Među brojnim delegacijama koje su se prisjetile legendarne akcije Prve proleterske brigade, koja važi za jednu od najvažnijih operacija tokom NOR-a, bila je i delegacija Općine Ilidža koju je predvodio zamjenik predsjedavajućeg Općinskog vijeća Ilidža, Samir Avdić.

- Prije 80 godina na našem Igmanu branila se država, a 50 godina kasnije ista planina bila je od vitalnog značaja za opstanak Bosne i Hercegovine. Tokom agresije na Igmanu potvrđene su tekovine antifašističke borbe iz Drugog svjetskog rata. Mislim da smo privilegovani što se Igman dobrim dijelom nalazi na teritoriji općine Ilidža - kazao je Samir Avdić, zamjenik predsjedavajućeg Općinskog vijeća Ilidža.

Osamdeseta godišnjica Igmanskog marša obilježena je odavanjem počasti učesnicima jedne od najslavnijih epizoda iz perioda Narodno-oslobodilačke borbe na više lokacija na planini Igman i prigodnim programom na Velikom polju.

Podsjećanja radi, Igmanski marš izveden je u noći između 27. i 28. januara 1942. godine, po dubokom snijegu i velikoj hladnoći na minus 38 stepeni. Oko 800 pripadnika Prve proleterske brigade, ali i žena i djece, pješaci je 17 sati kako bi stigli na slobodnu teritoriju Foče.

Delegacija Općine Ilidža prisustvovala 28. godišnjici zločina u kojem je ubijeno 68 Sarajlija

POČAST ŽRTVAMA MASAKRA NA MARKALAMA

Minutom šutnje, učenjem Fatihe i polaganjem cvijeća brojne delegacije, među kojima i delegacija Općine Ilidža, kao i brojni građani Sarajeva, odali su počast sugrađanima ubijenim u masakru na Markalama 5. februara 1994. godine. Tog kobnog dana minobacački projektil kalibra 120 milimetara ispaljen s agresorskih položaja ubio je 68, a ranio 142 građana Sarajeva.

Povodom 28. godišnjice ovog stravičnog zločina u Narodnom pozorištu Sarajevo održana je komemorativna sjednica čiji su organizatori bili Skupština Kantona Sarajevo, Gradsko vijeće Sarajeva i općinska vijeća s područja Kantona Sarajevo.

Delegaciju Općine Ilidža predvodili su zamjenici predsjedavajućeg Općinskog vijeća Ilidža, Samir Avdić i Redžo Lemezan.

Bosanskohercegovački kardinal i bivši nadbiskup, Vinko Puljić, na komemorativnoj sjednici poručio je kako sjećanjem na one



Kardinal Vinko Puljić na komemorativnoj sjednici

kojima je nasilno oduzet život i ranjene gajimo kulturu života, istovremeno se suprotstavljajući onima koji su agresorskim silama širili "kulturu smrti".

Tužna godišnjica obilježena na Spomen-obilježju Ranjeni kamen u Velikoj aleji

ŠEST GODINA OD UBISTVA DŽENANA MEMIĆA

Polaganjem cvijeća i učenjem Fatihe u Velikoj aleji obilježena je šesta godišnjica od ubistva Dženana Memića.

Njegova porodica s prijateljima, komšijama, poznanicima i običnim ljudima koji su željni istine i pravde okupili su se na mjestu gdje je nesretnog 8. februara 2016. godine Dženan zadobio povrede od kojih je sedam dana kasnije preminuo.

Cvijeće na Spomen-obilježju Ranjeni kamen, koje je posvećeno rahmetli Dženanu, položila je i delegacija Općine Ilidža predvođena načelnikom Nerminom Muzurom.

Porodica ubijenog Dženana zahvalila se okupljenima na podršci koju joj pružaju u borbi za istinu, a Muriz Memić, otac rahmetli Dženana, naglasio je da je njegova borba i borba njegove porodice ujedno borba za svu našu djecu i njihovu budućnost.



Arijana i Muriz Memić, sestra i otac rahmetli Dženana

Projekt dvojice učenika Richmond Park International Secondary School na Expo Sciences 2022 u Dubaiju


PODRŠKA MLADIM ZLATNIM INOVATORIMA

Zahvaljujući projektu "No need for speed" i pobjedi na BOSEPO-u mladi inovatori, Asad Grabovica i Gabriel Greenwich, izborili su učešće na izložbi EXPOScience 2022, koja se održala u Dubaiju.

Odlazak učenika Richmond Park International Secondary School i njihovog mentora Admira Đogića u Dubai podržala je i Općina Ilidža, a da se ova odluka ispostavila kao ispravna potvrdila je zlatna medalja koju je osvojio projekt kojeg su još nazvali "Pametni ležeći policajac".

- Drago mi je vidjeti da mladi nastoje kreirati stvari od kojih cjelokupna zajednica može imati veliku korist, a pogotovo ova kao što je projekt "No need for speed" kojeg su prezentovali u Dubaiju. Zlatna medalja je veliko priznanje i za Ilidžu - kazao je načelnik Općine Ilidža, Nermin Muzur.

Načelnik Muzur, ali i ministar privrede Kantona Sarajevo Adnan Delić, čije je ministarstvo također podržalo mlade inovatore i njihov odlazak u na EXPOScience 2022, iskazali su poseban interes i za projekt kojeg su mladi učenici osmislili kako bi pročišćavali vodu u rijeci Željeznici.



Greenwich, Grabovica i Đogić sa zlatnim medaljama

Dobri rezultati nisu prošli neopaženo u Općini Ilidža



Načelnik Muzur i bokserski reprezentativac Adem Fetahović

NOVČANE NAGRADE ZA NAJBOLJE ILIDŽANSKE SPORTISTE U 2021.

Načelnik Općine Ilidža Nermin Muzur ugostio je ilidžanske sportiste koji su kroz ostvarene rezultate u protekloj godini ostvarili pravo na novčane nagrade. Među 60 nagrađenih sportista isključivo su osvajači medalja na državnim prvenstvima i međunarodnim takmičenjima te oni koji imaju reprezentativni status.

Uz isplaćene nagrade od 300 KM, načelnik Muzur sportistima je uručio i prigodne poklone te im kazao da su u 2021. godini potvrdili kvalitet, ali da prostora za dodatni napredak uvijek ima, kao i da u ovoj kalendarskoj godini očekuje još bolje rezultate.

Načelnik Muzur svjestan je da se rezultati uz predan rad i kvalitetan trenažni proces usko vezuju za finansije, ali i sportsku infrastrukturu.

- U narednom periodu mnogo ćemo raditi na izgradnji nove sportske infrastrukture, kao i poboljšanju i rekonstrukciji postojeće na teritoriji općine Ilidža - poručio je načelnik Muzur.

Povodom 46. rođendana Osnovne muzičke škole Ilidža

SVEČANI KONCERT ZA PRAVE SLADOKUSCE



Ganović, Blazer-Katalinski i Avdić s Poveljom za životno djelo

Svečanim koncertom Osnovna muzička škola Ilidža 17. februara obilježila je 46. rođendan. Sjajnim izvedbama učenici obrazovne institucije počastili su sve koji su prisustvovali koncertu koji se održao u koncertnoj sali, a ovoj svečanosti prisustvovao je i zamjenik predsjedavajućeg Općinskog vijeća Ilidža Samir Avdić.

Iako je još prošlog ljeta OV Ilidža na Svečanoj sjednici povodom Dana Općine Ilidža posthumno uručilo Povelju za životno djelo porodici pokojnog Damjana Daše Babića, prvog direktora Osnovne muzičke škole Ilidža, identičan primjerak Samir Avdić je predao direktoru škole Amsalu Ganoviću i nastavnici na Odsjeku za harmoniku Jasni Blazer-Katalinski.

Inače, odluku o izgradnji Osnovne muzičke škole Ilidža donijela je Općina Ilidža 1975. godine, a sagrađena je u naselju Pejton, gdje se nalazi i danas, dok su prvi časovi održani početkom februara 1976. godine.

Na Četvrtoj vanrednoj sjednici Općinskog vijeća Ilidža



Podržana Odluku o utvrđivanju javnog interesa za izgradnju žičare

IZ HRASNICE NA IGMAN ŽIČAROM

Dnevni red Četvrte vanredne sjednice Općinskog vijeća Ilidža, koja je održana 17. februara, "skraćena" je nakon što je na zahtjev pomoćnika općinskog načelnika za imovinsko-pravne, stambene, geodetske poslove i katastar nekretnina Jasmina Volodera povučena druga tačka.

Pomoćnik načelnika za finansije Benjamin Mešak, govoreći o Izveštaju centralne popisne komisije za 2021. godinu, koji je bio prva tačka, kazao je da je Izveštaj rađen kako bi se pokazalo stvarno stanje, pogotovo kada su u pitanju sredstva za rad.

Također, naglasio je i problem ogromne liste viškova i manjkova što je, prema njegovom mišljenju, rezultat nepostojanja sistema već duži niz godina. Rješenje je uspostavljanje sistema koji omogućava uvid u korištenje opreme i vođenje evidencije, a usvojeno je i šest zaključaka iz kojih proističe lista aktivnosti koje je neophodno poduzeti.

Općinsko vijeće Ilidža iskazalo je potrebu rješavanja kanizacionih problema koji su posebno naglašeni u pojedinim dijelovima naše općine, a usvojena je i Odluka o utvrđivanju javnog interesa za izgradnju separatne kanizacione mreže na lokaciji Ilidža, naselje Osjek, ulica Hendekusa.

Ništa manje važna nije bila ni posljednja tačka dnevnog reda u kojoj su vijećnice i vijećnici OV Ilidža podržali Odluku o utvrđivanju javnog interesa za izgradnju kabinske gondole/ žičare "Hrasnica-Igman", što je projekt o kojem se u prošlosti samo govorilo ali su konkretni potezi izostali.

Vođena i diskusija o sistemu raspodjele javnih prihoda

TREĆA SJEDNICA "MREŽE ZA JAVNE FINANSIJE SOGFBIH"

Načelnik Općine Ilidža Nermin Muzur prisustvovao je Trećoj sjednici "Mreže za javne finansije Saveza općina i gradova FBiH" koja je održana na Ilidži.

Kao neformalni domaćin, načelnik Općine Ilidža otvorio je sjednicu i pozdravio skoro 80 učesnika ovog sastanka čiji je fokus bio je na sagledavanju trenutne finansijske pozicije općina i gradova u Federaciji Bosne i Hercegovine.

Vođena je diskusija i o postojećem sistemu raspodjele javnih prihoda, kao i o donošenju smjernica za učešće u Radnoj grupi za izradu metodologije raspodjele i pripadnosti javnih prihoda u FBiH.

Učesnici sastanka razgovarali su i o vraćanju vanjskog duga koji uopće nisu generisale jedinice lokalne samouprave.

Načelnik Muzur poručio je kako bi općine trebale biti najzdravije ćelije naše zemlje, te da se samo na taj način možemo nadati njenom prosperitetu.

Jedan od panelista sastanka bio je i Benjamin Mešak, pomoćnik načelnika Općine Ilidža za finansije.

Aktivnost u realizaciji UNDP-a



INSTALIRANA PLUĆA GRADA U MALOJ ALEJI

Pluća grada - zdrava pluća postavljena su i na Ilidži, nakon što su prethodno instalirana u općinama Centar, Vogošća i Ilijaš. Riječ je o instalaciji čiji je cilj skrenuti pažnju javnosti na štetne posljedice zagađenja zraka na ljudsko zdravlje, ali i na ekonomiju.

"Pluća" su napravljena od materijala u bijeloj boji, a bit će izložena svim vremenskim uslovima, uključujući oku nevidljive otrovne čestice iz zraka. Boja i trag na "plućima" će bez sumnje pokazati kakav to zrak udišemo.

Ova instalacija, koja se nalazi u Maloj aleji, je još jedna u nizu aktivnosti kroz projekt Zeleni ekonomski razvoj (GED), koji finansira Švedska, a realizuje Razvojni program Ujedinjenih nacija (UNDP).

Dvodnevno takmičenje učenika osnovnih i srednjih škola iz BiH i inostranstva održano na Ilidži 18. i 19. februara

BOSEPO 2022: OPĆINA ILIDŽA KAO INSPIRACIJA MLADIM INOVATORIMA



Šefica Kabineta općinskog načelnika, Lejla Abazović, u razgovoru s mladim inovatorkama

Trinaesta BOSEPO naučna olimpijada, dvodnevno takmičenje učenika osnovnih i srednjih škola iz Bosne i Hercegovine i inostranstva, održana je na Ilidži 18. i 19. februara. Mladi inovatori su u prostorijama Richmond Park School prezentirali više od 100 projekata iz kategorija energija, okoliš, inženjering i IT, a žiri je na kraju proglasio one najbolje.

Šefica Kabineta općinskog načelnika, Lejla Abazović, posjetila je BOSEPO 2022 i obišla neke od projekata koje su mladi inovatori predstavili uz sjajne prezentacije.

Zanimljivo da su projekti vezani za Ilidžu na kraju takmičenja osvojili zlatne medalje u kategoriji "Inženjering i IT". Naime, Aplikacija "The Map of Risks", koju su kreirale Merjem Pobrić i

Merjem Kurtović, dobila je visoke ocjene žirija, što je mladim inovatorkama bilo dovoljno za pobjedu. Kroz ovu aplikaciju korisnici mogu unijeti lične podatke, uploadovati fotografiju i na mapi označiti lokaciju rizika, što bi u budućnosti mogao biti odličan servis građanima za prijavu detektovanih problema.

Aplikacija "The Map of Risks" zlatnu medalju je podijelila sa još jednim projektom vezanim za Ilidžu. Ideja nazvana "PROŽECT", koja bi trebala uklanjati plutajući otpad iz rijeke Željeznice, a koju su osmislili Gabriel Greenwich i Hasanom Lafciogluom, također se pokazala kao izvrsna. Pokretna mreža koja bi trebala biti "brana" ali i kolektor plutajućeg otpada jednako efikasno mogla bi se koristiti na svim drugim vodotocima u Bosni i Hercegovini, ali i šire.

Sastanak s predsjednikom Udruženja za kreativno učenje "MAK"

OPĆINA ILIDŽA PODRŽALA RAD SOBE ZA SENZORNU INTEGRACIJU DJECE S POTEŠKOĆAMA U RAZVOJU

Predsjedavajući Općinskog vijeća Ilidža Tarik Stambolić održao je sastanak s predsjednikom Udruženja za kreativno učenje "MAK" Enisom Aganović, a sastanku je prisustvovala i vijećnica Ajla Milišić-Pepić, koja je i pokrenula inicijativu za podršku radu sobe za senzornu integraciju.

Kroz rad ove sobe, koji je Općina Ilidža finansijski podržala, djeci sa poteškoćama u razvoju i roditeljima na području općine Ilidža bit će omogućen prolazak kroz tretmane senzorne integracije, što će dugoročno doprinijeti poboljšanju njihovog psihofizičkog stanja i unaprijediti kvalitet života.

Kroz ove tretmane poboljšava se stanje senzoričke, zatim grube i fine motorike, što čini odličnu osnovu za napredovanje u pažnji, govoru, komunikaciji, interakciji i učenju.

Dodjeli zahvalnica prisustvovao je i načelnik Općine Ilidža Nermin Muzur, koji je ovom udruženju poželio mnogo uspjeha u



Osjetljive kategorije društva zaslužuju posebnu pažnju

dalnjem radu. U narednom periodu, Općina Ilidža će nastaviti poduzeti nove radnje kako bi dodatno pomogla razvoj djece s poteškoćama u razvoju.

30. godišnjica od historijskog Referenduma o nezavisnosti Bosne i Hercegovine

OBILJEŽEN DAN NEZAVISNOSTI BIH



Počast šehidima i poginulim borcima odata je polaganjem cvijeća i učenjem Fatihe na Centralnom spomen-obilježju na Ilidži

Povodom 1. marta, Dana nezavisnosti Bosne i Hercegovine, održana je Svečana sjednica Općinskog vijeća Ilidža. Delegacija Općine Ilidža predvođena načelnikom Nerminom Muzur, predsjedavajućim Općinskog vijeća Ilidža Tarikom Stambolićem i njegovim zamjenicima Samirom Avdićem i Redžom Lemezanom na 30. godišnjicu jednog od najvažnijih događaja u historiji naše zemlje odala je počast šehidima i poginulim borcima polaganjem cvijeća na Spomeniku borcima NOR-a u Velikom parku i Centralnom spomen-obilježju Ilidža.

Obilježavanju Dana nezavisnosti prisustvovali su i predstavnici političkih partija, boračkih udruženja i organizacija s područja općine Ilidža.

Na Svečanoj sjednici Općinskog vijeća Ilidža prisutnima su se obratili zamjenik predsjedavajućeg Općinskog vijeća Ilidža Redžo

Lemezan i načelnik Nermin Muzur.

- Za nas 1. mart, nije samo običan datum. Za nas, sinove i kćeri Bosne i Hercegovine, 1. mart je simbol otpora, slobode, žrtve, demokratije i borbe za suverenitet i nezavisnost. Mnogi od vas učestvovali su na referendumu, ja nisam. Možda imam i najmanje prava da pričam o 1. martu. Mišljenja sam da mlado stanovništvo Bosne i Hercegovine igra odlučujuću ulogu u očuvanju slobode, nezavisnosti i suvereniteta naše države - kazao je zamjenik predsjedavajućeg OV Ilidža Redžo Lemezan.

Načelnik Općine Ilidža, Nermin Muzur, skrenuo je pažnju na nekoliko izuzetno bitnih stvari.

- Na našoj je općini postojao Most spasa, Put spasa, Tunel spasa... No, ako pogledamo u kakvom su stanju, recimo Most i Put spasa, onda to baš i nije dobra poruka. Ipak, ja vjerujem da ćemo naredni 25. novembar i 1. mart dočekati u puno boljoj atmosferi - naglasio je načelnik Muzur, naglasivši:

- Mi moramo znati i biti svjesni činjenice da nas niko nije odbranio već mi sami, ali isto tako trebamo znati da naša snaga zavisi isključivo od nas i nikakvih drugih faktora.

Delegacije svih nivoa vlasti, među kojima i delegacija Općine Ilidža, povodom Dana nezavisnosti BiH položile su cvijeće na šehidskom mezarju Kovači u Sarajevu, kao i ispred Vječne vatre, u čast borcima NOR-a, te na Spomen-obilježju ubijenoj djeci opkoljenog Sarajeva 1992. - 1995.

Delegaciju Općine Ilidža činili su zamjenik predsjedavajućeg OV, Samir Avdić, te vijećnici Anida Skenderagić i Amar Bungur.



Delegacija Općine Ilidža na šehidskom mezarju Kovači

Četiri godine od smrti legendarnog bosanskohercegovačkog košarkaša i trenera Sabita Hadžića

NE BLIJEDI SJEĆANJE NA NAŠU LEGENDU



Rukovodstvo Općine Ilidža odalo počast

Prije četiri godine, u 61. godini života, od posljedica moždanog udara preminuo je legendarni košarkaš i košarkaški trener Sabit Hadžić Sabe.

Učenjem Fatihe i polaganjem cvijeća na mezarju Kovači rukovodstvo Općine Ilidža, odalo je počast najboljem ilidžanskom sportisti, a kasnije i izuzetno uspješnom košarkaškom stručnjaku.

Rahmetli Hadžić jedan je od rijetkih bh. sportista koji se tokom igračke karijere okitio titulom klupskog prvaka Evrope i olimpijskom medaljom, a osim Kupa evropskih šampiona sa Bosnom je osvajao i šampionat bivše Jugoslavije. Košarkašku reprezentaciju Bosne i Hercegovine u četiri navrata odveo je na Eurobasket (1997, 1999, 2001. i 2011.).

- Sabereš, oduzmeš... medalje koje je osvojio i uspjesi koje je ostvario kao igrač čine ga najboljim sportistom naše Ilidže - konstatovao je načelnik Općine Ilidža, Nermin Muzur.

Turnir rukometnih veterana povodom Dana nezavisnosti BiH održan u sportskoj dvorani "Sabit Hadžić"

POBJEDNIČKI PEHAR PRIPAO DOMAĆINU

Veteranski rukometni klub Sarajevo pobjednik je Sarajevo Cupa 2022 koji je organizovan povodom 1. marta, Dana nezavisnosti Bosne i Hercegovine. Do pobjedničkog pehara VRK Sarajevo stigao je nakon što je u finalu savladao Goražde rezultatom 18:16.

U susretu za treće mjesto Maglaj je bio bolji od Konjica i to poslije tri serije sedmeraca, nakon što je rezultat poslije 40 minuta igre glasilo 18:18.

Za najboljeg igrača turnira, čiju organizaciju je podržala i Općina Ilidža, proglašen je nekadašnji reprezentativac Bosne i Hercegovine Emir Šahinović, dok je bivšem kapitenu rukometnih Zmajeva, Enidu Tahiroviću, pripalo priznanje za najboljeg golmana.



Najbolji igrač turnira Emir Šahinović (Goražde) u akciji

U saobraćajnoj nesreće, prilikom povratka sa Bjelašnice, ostali bez osnovnog sredstva za rad

OPĆINA IZDVOJILA 50.000 KM ZA NABAVKU KOMBI VOZILA ZA GSS STANICU SARAJEVO

Načelnik Općine Ilidža, Nermin Muzur, potpisao je Sporazum o finansiranju s predsjednikom Upravnog odbora Gorske službe spašavanja - stanica Sarajevo, Dženadinom Veladžićem, koji se odnosi na nabavku kombi vozila za potrebe GSS-a.

Sredstva u iznosu od 50.000 KM za ovo finansiranje iz Budžeta Općine Ilidža osigurala je Vlada Kantona, a potreba za nabavkom kombija nastala je nakon saobraćajne nesreće koju su pripadnici GSS-a doživjeli prilikom povratka sa Bjelašnice, gdje su tokom zimskog perioda svakodnevno angažovani.

S obzirom na to da pripadnici GSS-a često rizikuju svoje živote dok nastoje pomoći drugima izuzetno je važno da su adekvatno opremljeni.

- Značaj i esenciju Gorske službe spašavanja - stanica Sarajevo na djelu smo mogli vidjeti tokom poplava koje su u novembru prošle godine pogodile općinu Ilidža, ali i susjednu nam općinu



Načelnik Muzur i predsjednik GSS-a Dženadin Veladžić

Novi Grad. Opremljenost, pripremljenost i stručnost svojevrsni je garant da pripadnici GSS-a u kriznim situacijama mogu reagovati na vrijeme i na pravi način - rekao je načelnik Nermin Muzur.

Održana općinska takmičenja osnovnih škola iz predmeta Matematika, Informatika, Geografija i Fizika

OSNOVCI DOKAZALI: ZNANJE ŽIVI NA ILIDŽI



Takmičenje iz Geografije održano je u Prvoj osnovnoj školi

Na takmičenju učenika osnovnih škola na području Općine Ilidža iz predmeta Matematika učestvovao je ukupno 91 učenik. Prvo mjesto u ekipnom plasmanu zauzela je Osmo osnovna škola "Amer Ćenanović" (296 bodova). Druga je sa 258 bodova bila Prva osnovna škola, dok je treće mjesto pripalo Petoj osnovnoj školi.

Najviše znanja iz predmeta Fizika pokazali su učenici Druge osnovne škole koji su u dvije kategorije (osmi i deveti razred) osvojili ukupno 177,5 bodova, što im je bilo i više nego dovoljno za osvajanje prvog mjesta. Drugo je pripalo Osmoj osnovnoj školi "Amer Ćenanović" (162,5 bodova), dok je treća bila Prva osnovna škola sa 147 bodova.

Na općinskom takmičenju iz predmeta Informatika najviše znanja pokazali su učenici Osme osnovne "Amer Ćenanović". S 67,5 bodova učenici škole iz Butmira uvjerljivo su osvojili prvo mjesto na takmičenju čiji je domaćin bila Prva osnovna škola. Druga pozicija pripala je Drugoj osnovnoj školi sa 46,5 bodova, dok su na trećem mjestu završili učenici Četvrtne osnovne škole.

Učenici Desete osnovne škole ekipni su pobjednici općinskog takmičenja iz nastavnog predmeta Geografija. U takmičenju na kojem je učestvovalo 36 učenika ekipa Druge osnovne škole osvojila je ukupno 212 bodova, dok je Treća osnovna škola imala samo dva boda manje. Treća pozicija pripala je Sedmoj osnovnoj školi sa 194,5 boda.

Podrška završnim radovima na izgradnji vakufskog objekta u bh. entitetu RS

FINANSIJSKA POMOĆ ZA DŽEMAT KIJEVO



Načelnik Muzur tokom posjete Kijevu

Načelnik Općine Ilidža, Nermin Muzur, posjetio je džemat Kijevo, gdje je obišao radove na vakufskom objektu koji se nalazi u završnoj fazi. Izgradnju ovog objekta koji se nalazi u

neposrednoj blizini džamije u Kijevu finansijski podržala je i Općina Ilidža, kao i Muftijstvo sarajevsko i Medžlis Islamske zajednice Sarajevo.

Osim načelnika Muzura u posjeti džematu Kijevo bili su i muftija sarajevski prof. dr. Nedžad Grabus kao i glavni imam dr. Abdulgafar-ef. Velić, koji su nakon novembarskih poplava posjetili Ilidžu i pružili podršku našoj lokalnoj zajednici.

- Ljudski je pomoći i od toga nikada ne prežemo, čak ako i nije riječ o području općine Ilidža. Bilo mi je iznimno zadovoljstvo posjetiti džemat Kijevo, koji se nalazi na prostoru bh. entiteta RS - kazao je načelnik Muzur, te dodao:

- Naša lokalna zajednica će nam uvijek biti prioritet, ali nikada nećemo okretati glavu od problema i potreba našeg naroda, pogotovo onog kojeg živi u manjem bh. entitetu.

Svečana sjednica Općinskog vijeća Ilidža održana u dvorani hotela Hills

PRIZNANJA OPĆINE ILIDŽA ZA 2022. GODINU



Zlatna plaketa Općine Ilidža za 2021. godinu dodijeljena je Adnanu Šteti

Svečanom sjednicom Općinskog vijeća Ilidža obilježen je 12. mart, Dan Općine Ilidža na kojoj su dodijeljena priznanja Općine Ilidža za 2022. godinu. Uz veliki broj zvanica iz javnog, političkog i kulturnog života, svečanosti povodom 26. godišnjice reintegracije općine Ilidža, prisustvovali su i ministri Vlade Kantona Sarajevo, predsjedavajući Skupštine KS, načelnici općina, predsjedavajući općinskih vijeća, zastupnici Skupštine KS, vijećnici OV Ilidža, ali i uposlenici Općine Ilidža.

- Rijetki su prostori na svijetu, a kamoli u BiH gdje je moguće direktno pogledati svjedočenje kontinuiranog ljudskog življenja koje traje više od šest hiljada godina - konstatovao je Samir Avdić, zamjenik predsjedavajućeg OV Ilidža u svom obraćanju.



Bogić Bogićević i Tarik Stambolić, predsjedavajući OV Ilidža

Načelnik Nermin Muzur osvrnuo se na historijsku važnost obilježavanja 12. marta - Dana Općine Ilidža, kazavši da je Ilidža mjesto gdje se Bosna rađa, aludirajući na izvorište rijeke Bosne, ali i na samu važnost prostora na kojem živimo.

- U kratkom periodu ostvarili smo značajan napredak na mnogim poljima. Hvala svima koji su nam pomogli, hvala mojim saradnicima kao i mojim prethodnicima koji su uradili dobre stvari

za Ilidžu. Hvala i onima koji to nisu učinili jer su tako nama ostavili prostora da napravimo puno više - naglasio je Muzur.

Odlukom OV Ilidža na Devetoj redovnoj sjednici Povelju počasni građanin općine Ilidža dobio je Bogić Bogićević, a Povelja za životno djelo posthumno je dodijeljena Muratu Šaranu.

Pojedinačna Zlatna plaketa pripala je Adnanu Šteti, ministru saobraćaja KS, dok je kolektivna otišla u ruke Seje Brajlovića, vlasnika restorana "Brajlović". Srebrnu plaketu dobio je Mustafa Balaš, a kolektivne su pripale kompanijama Stambolić d.o.o, JP Ilidža d.o.o. i Bosman d.o.o.

Zahvalnice Općine Ilidža dobili su Vaso Bosiljić, Vahid Muharemović, Udruženje demobilisanih boraca veterana ARBiH "Kamp boraca", Hazim Viteškić, Ramo Koldžo (posthumno), prof. dr. Almir Bašović, Haris Ovčina, Anes Bostandžić, Asim Fetahović, dok je Plaketu odbrane posthumno dobio Izet Kahvić.

Prije Svečane sjednice brojne delegacije položile su cvijeće na Spomeniku borcima NOR-a, ali i na Centralnom spomen-obilježju, gdje su učenjem Fatihe odali počast šehidima, poginulim borcima i civilnim žrtvama agresije na BiH.



Historijski projekt izgradnje tramvajske pruge na relaciji Ilidža - Hrasnica

RASPISAN TENDER ZA IZVOĐAČA RADOVA

Za jedan od najznačajnijih infrastrukturnih projekata u Kantonu Sarajevo 11. marta objavljen je Poziv za dostavu ponuda za odabir izvođača radova.

Izgradnja tramvajske pruge do Hrasnice u dužini od 12,96 kilometara je, kako je naveo načelnik Nermin Muzur, historijski projekt za općinu Ilidža.

- Ono o čemu se pričalo godinama unazad, još i prije agresije na Bosnu i Hercegovinu, mi smo uspjeli pokrenuti za veoma kratak period. Ponosan sam na opredijeljenost Vlade Kantona Sarajevo za realizaciju ovog projekta i na saradnju sa ministrom Šetom, sa kojima činimo historijski trenutak za Hrasnicu i Ilidžu - kazao je načelnik Muzur.

Projekt izgradnje pruge Ilidža - Hrasnica, kako je istakao ministar saobraćaja KS Adnan Šteta značajno će poboljšati saobraćaj u Kantonu Sarajevo.

- Plan je da na dužini od 12,96 kilometara pruge bude izgrađeno 20 stajališta, kao i okretnica na Ilidži. Zadovoljan sam što je Vlada prepoznala moje inicijative i što smo došli do ovoga što imamo sada - rekao je ministar saobraćaja KS, Adnan Šteta.

Posjeta načelnika Muzura blažujskoj parohiji



U razgovoru sa parohom blažujskim jerejom Darkom Danilovićem

U HRAMU SVETOG SAVE

Načelnik Općine Ilidža, Nermin Muzur, posjetio je Hram Svetog Save u Blažuju, gdje se u razgovoru sa parohom blažujskim jerejom Darkom Danilovićem informisao o potrebama i izazovima pravoslavnih vjernika na području općine Ilidža, kao i blažajske parohije.

- Kroz programe podrške u proteklom periodu pomagali smo sve vjerske zajednice, a s tom podrškom ćemo nastaviti i u budućnosti - kazao je načelnik Nermin Muzur, dodavši da su međusobno razumijevanje, uvažavanje te međureligijski sklad itekako važni za izgradnju kvalitetnijih međuljudskih odnosa.

U društvu načelnika Muzura Hram Svetog Save u Blažuju posjetili su i zamjenik predsjedavajućeg OV Ilidža Samir Avdić, vijećnik Selver Zečirović te Samir Habota, predsjednik OO SDP Ilidža.

Inače, Hram Svetog Save u Blažuju sagrađen je prema projektu arhitekte Augusta Buča, projektanta Gradske tržnice u Sarajevu, kao i nekoliko vila na Ilidži. Podignut je 1897. godine.



Forto, Muzur i Šteta na ulazu u Hrasnicu

Krajem prošle godine, nakon što su premijer Edin Forto i ministar Šteta potpisali mandatno pismo sa EBRD-om, raspisan je tender za nadzor i napravljeni su prvi koraci za početak realizacije ovog projekta.

- Od kako znam za sebe slušam legendu o tramvaju za Hrasnicu. Sada legendu pretvaramo u stvarnost - istakao je premijer Forto.

Ministar zdravstva KS Haris Vranić u posjeti

POKRENUTA PROCEDURA FORMIRANJA AMBULANTE NA STUPSKOM BRDU



Načelnik Muzur i ministar Vranić

Nermin Muzur, načelnik Općine Ilidža, održao je sastanak sa ministrom zdravstva Kantona Sarajevo, Harisom Vranićem, a glavna tema ovog sastanka bila je iznalaženje najboljeg rješenja za otvaranje ambulate na Stupskom Brdu.

Ovom prilikom, načelnik Muzur je iskazao zahvalnost na razumijevanju Vlade Kantona Sarajevo i Ministarstva zdravstva Kantona Sarajevo za pokretanje ove inicijative, s obzirom na to da je ona bila na čekanju dugi niz godina.

Ministarstvo zdravstva Kantona Sarajevo prepoznalo je važnost ovog projekta, zbog čega je ministar Vranić naglasio da će se pobrinuti i za kadar koji je potreban za rad u ovoj ambulanti, a Općina Ilidža i načelnik Muzur pripremit će sve potrebne radnje za pokretanje ovog projekta.

Izabranici Harisa Zolote historijskim rezultatom uveličali Dan Općine Ilidža

ODBOJKAŠI ILIDŽE IZBORILI PLASMAN U PREMIJER LIGU BIH

*Šampionska atmosfera u dvorani "Sabit Hadžić"*

Odbojkaši Ilidže ostvarili su historijski uspjeh izborivši plasman u Premijer ligu Bosne i Hercegovine pobjedom 3:0 nad Brezom 1934 u 14. kolu Super lige FBiH. Za tim koji s klupe predvodi bivši kapiten reprezentacije Bosne i Hercegovine, Haris Zolota, ovo će biti prvi put da igra u elitnom razredu bh. odbojke otkako se igra jedinstveno takmičenje na cijeloj teritoriji naše zemlje.

Ilidžanski klub, čiji su rad 2016. godine reaktivirali Emir Memić i Haris Zolota, šampionsku sezonu završio je s omjerom od 12 pobjeda i dva poraza, a 36 bodova bilo je sasvim dovoljno za plasman u društvo najboljih bosanskohercegovačkih klubova.

Šampionski pehar na Ilidžu donijeli su Ammar Hasanbegović, Tarik Zolota, Nadir Šehić, Muharem Brigić, Nermin Muzur, Muhamed Kenjar, Imad Merdžanović, Adi Topalović, Edis Kešmer, Mirza Maksumić, Miodrag Marinković i Ahmed Karup.

Plasmanom ilidžanskih odbojkaša naša općina će od naredne sezone imati četiri kluba sa statusom premijerligaša, o čemu je

načelnik Općine Ilidža, Nermin Muzur, i ranije često govorio.

- Kada smo aktivirali klub bio sam tu s još nekolicinom starijih igrača. Bili smo uz momke koji su sada izrasli u ozbiljne odbojkaše, a ovoga puta mi je bilo posebno zadovoljstvo biti dio tima. Ponosan sam na njih i sretan što će Ilidža u narednoj takmičarskoj sezoni imati jednog premijerligaša više - kazao je Nermin Muzur, načelnik Općine Ilidža, koji je i sam dugo bio kapiten ovoga kluba.

Utakmica u dvorani KSC "Sabit Hadžić" protekla je u sjajnoj atmosferi, a zasluge za to pripadaju publici koja je u dobroj mjeri ispunila tribine dvorane koja nosi ime našeg sportskog velikana.

Klupsko rukovodstvo OK Ilidža bivšim igračima, trenerima i ljudima koji su bili angažovani u i oko kluba dodijelilo je zahvalnice za doprinos u razvoju ovog sportskog kolektiva, koji je tokom agresije na Bosnu i Hercegovinu djelovao pod imenom Odbojkaški klub Čarli.

Završni turnir Kupa Bosne i Hercegovine za rukometašice

ŽRK ILIDŽA NASTUPIO NA FINAL FOURU

Pobjedom nad Mirom, u revanš-susretu četvrtfinala Kupa Bosne i Hercegovine, rezultatom 26:19 rukometašice Ilidže nadoknadile su šest golova zaostatka iz prvog meča u Prijedoru i plasirale se na Final Four koji je održan u Grudama.

Nažalost, sastav Krivaje iz Zavidovića bio je nepremostiva prepreka za ilidžanski sportski kolektiv, koji ove godine slavi 70. rođendan pa su Ilidžanke peto učešće na završnom turniru Kupa Bosne i Hercegovine okončale porazom 24:27.

Peharom osvajača Kupa Bosne i Hercegovine na kraju su se okitile rukometašice Gruda savladavši u finalu Kupa ekipu Krivaje rezultatom 34:23 (17:13).

*Slavlje poslije velike pobjede nad Mirom*

Jedanaest godina od smrti bivšeg načelnika Općine Ilidža

SJEĆANJE NA AMERA ČENANOVIĆA



Premинуo u 51. godini

Prije 11 godina, u 51. godini života, na bolji svijet je preselio Amer Čenanović, drugi po redu načelnik Općine Ilidža.

Učenjem Fatihe i polaganjem cvijeća, u haremu džamije u Butmiru, načelnik Općine Ilidža Nermin Muzur i predsjedavajući Općinskog vijeća Ilidža Tarik Stambolić odali su poštovanje bivšem načelniku Općine Ilidža, rahmetli Ameru Čenanoviću kojeg ćemo pamtiti po velikom angažmanu i zalaganju za dobrobit naše lokalne zajednice.

Rahmetli Amer je uživao veliko poštovanje u narodu, čak i njegovih političkih oponenta. Čovjek koji je rođen u Butmiru 25. decembra 1961. godine bio je prepoznatljiv po jednostavnosti i bliskosti sa običnim svijetom.

Za načelnika Općine Ilidža izabran je na Lokalnim izborima 2004. godine, novi mandat osvojio je i 2008. godine, a smrt ga je zatekla upravo na poziciji koju su mu povjerili glasači.

U organizaciji Udruženja boraca Bosnae Zelene beretke Ilidža

GODIŠNJICA POGIBIJE HAJRUDINA KLEPE

Delegacija Općine Ilidža predvođena predsjedavajućim OV Ilidža Tarikom Stambolićem i njegovim zamjenicima, Samirom Avdićem i Redžom Lemezanom, prisustvovala je obilježavanju 30. godišnjice pogibije Hajrudina Klepe. Polaganjem cvijeća i učenjem Fatihe u haremu džamije u Butmiru kao i na mjestu pogibije u Donjem Kotorcu, počast rahmetli Klepi odali su rodbina, prijatelji, saborci i predstavnici boračkih udruženja,

Kao pripadnik Zelenih beretki Klepo se među prvima uključio u akciju izuzimanja MTS-a iz Krtelja, tadašnje baze Specijalne jedinice policije MUP-a RBiH, a poginuo je od snajperskog hica u pokušaju da osposobi transporter.

Operacija izuzimanja oružja iz Krtelja, počela je nakon što je pokojni Emil Gavranović - Beban, Butmiranin i pripadnik



Članovi porodice rahmetli Hajrudina Klepe

Specijalne jedinice MUP-a RBiH, svojim komšijama prosljedio poruku "Krtelji su slobodni, ko prije curi njegova je".

Jedna od najvažnijih borbi za opkoljeno Sarajevo i slobodne teritorije općine Ilidža

KOTORAČKE BITKE ČUVAMO OD ZABORAVA



Okupljeni ispred MZ Donji Kotorac

Manifestaciju "Dani kotoračkih bitaka" organizovali su JOB "Unija veterana" Ilidža i Općina Ilidža, a u saradnji sa Ministarstvom za boračka pitanja Kantona Sarajevo, mjesnim zajednicama Butmir i Donji Kotorac, kao i Osmom osnovnom školom "Amer Čenanović" iz Butmira.

Učenjem Fatihe i polaganjem cvijeća na spomen-obilježjima u Butmiru i Donjem Kotorcu obilježena je godišnjica Kotoracke bitke i odata počast svim šehidima i poginulim borcima tokom agresije na Bosnu i Hercegovinu. Historijska bitka, koja se odvijala u periodu od 17. do 21. marta 1993. godine, smatra se jednom od najvažnijih za opkoljeno Sarajevo, ali i slobodne prostore općine Ilidža.

Osim godišnjice legendarne bitke, u kojoj su teške gubitke pretrpjele neke od najelitnijih specijalnih jedinica bivše JNA, obilježen je i Dan mjesne zajednice Butmir.

Načelnik Općine Ilidža, Nermin Muzur, te predsjedavajući Općinskog vijeća, Tarik Stambolić i njegov zamjenik Samir Avdić, predvodili su delegaciju Općine Ilidža koja je položila cvijeće na spomen-obilježja u Butmiru i Gornjem Kotorcu, kao i na mezaru bivšeg načelnika Općine Ilidža Amera Čenanovića.

Cvijeće na spomen-obilježja položile su i delegacije boračkih udruženja, Ministarstva za boračka pitanja KS i političkih partija.

Načelnik Općine Ilidža panelista na projektu "Jačanje integriteta i transparentnosti u javnom sektoru"

MUZUR: POSTALI SMO PRIMJER PROMJENA



Načelnik Općine Ilidža, Nermin Muzur, učestvovao je na završnoj konferenciji projekta "Jačanje integriteta i transparentnosti u javnom sektoru" koji provodi UNDP uz podršku Britanske ambasade u Bosni i Hercegovini.

Konferencija je okupila predstavnike Vlada Kantona Sarajevo i Vlada Tuzlanskog kantona, 12 jedinica lokalne samouprave, te javnih preduzeća i ustanova, a partneri na projektu podijelili su iskustva i koristi koje će imati od rezultata rada i saradnje.

Općinski načelnik Nermin Muzur bio je jedan od učesnika panela II, u kojem je pored njega sudjelovao Suad Huskić, načelnik Općine Tešanj, te predstavnice gradova Prijedor i Gradiška, Zinajda Hošić i Verica Vujat, dok je peti panelista bio je gradonačelnik Pule.

Načelnik Muzur naglasio je kako je Općina Ilidža u prethodnih petnaest mjeseci uspjela uvesti ozbiljne promjene kada je riječ o jačanju integriteta i transparentnosti u javnom sektoru.

- Za samo godinu postali smo primjer promjena koji najčešće prezentuju naši partneri. U proteklom periodu formirali smo i zasebnu službu, koja se bavi pitanjima i temom koje tretira ova konferencija, a koja služi kao svojevrsni filter svih odluka- rekao je načelnik Muzur.

Načelnik je istakao da je ponosan na saradnju Općine Ilidža sa Uredom za borbu protiv korupcije i upravljanje kvalitetom KS, te je naglasio kako je Ilidža jedna od rijetkih općina koju je Erik Larson, savjetnik u Uredu za borbu protiv korupcije posjetio više puta.

Poslije više od 30 godina poznato sarajevsko izletište više nije u mraku, spreman plan i za Hrasnički stan

NA STOJČEVCU ZASJALA ULIČNA RASVJETA

Ulična rasvjeta na Stojčevcu, nakon 30 godina, upaljena je 16. marta te je na taj način napravljen novi iskorak u obnovi i rekonstrukciji poznatog sarajevskog izletišta koje je bilo zapušteno i prepušteno zubu vremena u protekle tri decenije.

Nakon instaliranja led rasvjete u ulicama koje vode ka Stojčevcu, napravljeni su i prvi konkretni potezi ka obnovi zelenih površina u ovoj istinskoj oazi podno planine Igman.

Načelnik Općine Ilidža, Nermin Muzur, održao je sastanak s ministrom privrede Kantona Sarajevo Adnanom Delićem, direktorom Kantonalne javne ustanove za zaštićena prirodna područja Asadom Jeleškovićem i direktorom KJP Sarajevo-šume Samirom Omerovićem, a jedna od glavnih tema bio je nastavak radova na Stojčevcu koji se odnose na ambijentalno uređenja.

Osim Stojčevca razgovaralo se i o lokalitetu Hrasničkog stana na planini Igman, a koji teritorijalno pripada općini Ilidža.



Tri decenije Stojčevac je bio zapušten i prepušten zubu vremena

Načelnik Muzur iskazao je spremnost i zainteresovanost Općine Ilidža za uređenjem Hrasničkog stana, a koji bi se uz Stojčevac i već planiranu rekonstrukciju ratnog puta preko Igmana mogao zaokružiti u jednu ozbiljnu cjelinu.

Poboljšanje saobraćajne infrastrukture

REKONSTRUKCIJA ULICA NA ILIDŽI

Iako krajem marta građevinska sezona još nije kako treba ni počela, u naselju Osjek asfaltiran je krak ulice Osik u dužini od 277 metara, i to od ulice Stara pruga do ulice Hendekuša.

Osim dijela ulice Osik, u Mjesnoj zajednici Osjek asfaltirana je i pješačka staza u ulici Rate Dugonjića, i to u dužini od 62 metra.



Krak ulice Osik

Novi asfalt položen je i u Mitrićima, te je tako riješen dugogodišnji problem ovog naselja, a asfaltiran je i dio ulice Zujevska dužine 192 metara.



Novi asfalt u ulici Mitrići

U Mjesnoj zajednici Blažuj asfaltni radovi obavljeni su u dijelu ulice Vlakovo, od broja 81 do broja 89. Dužina asfaltirane saobraćajnice je 119 metara, a njena širina je od 3 do 4,2 metra, dok je u ulici Zeleni ariš položen asfalt u dužini 97 metara.



192 metara novog asfalta u ulici Zujevska

Položen je i asfalt u ulici Cap Anamur, koja se nalazi u Mjesnoj zajednici Otes. Asfaltiran je dio saobraćajnice ukupne dužine 90 metara, a širina asfalta iznosi četiri metra.

Započeti su i asfaltni radovi na uređenju ulica unutar izletišta Stojčevac, koje bi ovog ljeta trebalo biti rekonstruisano i obnovljeno.

Najavljen i nastavak projekta "Za novo lice Ilidže" NOVE FASADE I KROVOVI



Stambena zgrada u ulici Derviš-paše Bajezidagića

Zgrada u ulici Derviš-paše Bajezidagića uspješno je prošla kroz projekt izrade termo fasada, odnosno utopljanja stambenih zgrada za kolektivno stanovanje, koji realizuje Općina Ilidža.

Projekt nazvan "Za novo lice Ilidže" ima za cilj smanjenje troškova grijanja i unapređenje energetske efikasnosti objekta, ali i smanjenje zagađenosti zraka, kao i produženje životnog vijeka nekretninama.

Osim projekta utopljanja zgrada, Općina Ilidža aktivno radi i na obnovi starih, dotrajalih i uništenih krovova na stambenim zgradama. Novi krov dobila je zgrada u ulici 15. maj.

Za potrebe regulacije korita rijeke Željeznice LINIJE EKSPROPRIJACIJE



U dogovoru sa Agencijom za vodno područje rijeke Save

Općina Ilidža odlučna je da u što skorije vrijeme riješi probleme vezane za regulaciju vodotoka i riječnih korita. Zbog problematike koja traje godinama svaka poplava građanima nanosi ozbiljne materijalne štete. Nažalost, tako je bilo i u novembru 2021. godine kada je najveću štetu prouzrokovala u ilidžanskom naselju Otes, zbog čega je regulacija korita rijeke Željeznice na ovom lokalitetu označena kao prioritarna.

- Nakon što smo, kroz podršku Ministarstva privrede KS i ministra, Adnana Delića osigurali sredstva za eksproprijaciju zemljišta, u dogovoru sa Agencijom za vodno područje rijeke Save, izrađene su linije eksproprijacije regulacije korita Željeznice, nizvodno od mosta u Otesu do ušća u Bosnu - kazao je načelnik Općine Ilidža, Nermin Muzur, dodavši da je u izradi elaborat za eksproprijaciju nakon čega će se pristupiti samom procesu eksproprijacije na terenu.

Na Trinaestoj redovnoj sjednici Općinskog vijeća Ilidža

USVOJEN REKORDNI REBALANS BUDŽETA, 64 POSTO ZA KAPITALNE PROJEKTE

Na Trinaestoj redovnoj sjednici Općinskog vijeća Ilidža jednoglasno je usvojen Rebalans Budžeta Općine Ilidža za 2022. godinu, koji će iznositi rekordnih 53,35 miliona KM, što je značajno uvećanje u odnosu na Budžet (38.120.000 KM) koji je usvojen krajem decembra 2021. godine.

Kroz usvojene Izmjene i dopune Budžeta Općine Ilidža za 2022. godinu sredstva za kapitalne projekte su sa nekih 50% povećana na imponantnih 64%, a načelnik Općine Nermin Muzur, prihvatio je sve amandmane koji su predloženi. Muzur je uz to naglasio kako omjer budžeta i postotka kapitalnih projekata kakav ima Općina Ilidža nema niko u BiH.

Pomoćnik načelnika za finansije kazao je kako su u Rebalansu Budžeta Općine Ilidža zadržani i svi amandmani koji su podneseni i usvojeni u Budžetu krajem prošle godine.

Kroz jednoglasno usvojeni Rebalans Budžeta za 2022. godinu, vijećnice i vijećnici Općinskog vijeća Ilidža potvrdili su jasnu želju i viziju Ilidže za ozbiljnim promjenama u narednom periodu.

Načelnik Muzur svečano otvorio turnir



U periodu od 15. do 17. aprila Košarkaški klub Impuls uspješno je organizovao 10. Internacionalni turnir u košarci za mlađe kategorije Basket Cup Sarajevo 2022. Na turniru je učestvovalo 98 ekipa iz Slovenije, Mađarske, Hrvatske, Srbije i Bosne i Hercegovine, s više od 1.200 košarkašica i košarkaša.

Tokom tri takmičarska dana odigrano je 209 utakmica u pet uzrasnih kategorija, odnosno deset ako se u obzir uzme podatak da su se takmičili u ženskoj i muškoj konkurenciji.

Pored KSC "Sabit Hadžić" utakmice su ugostili Arena Hills i dvorana "Ramiz Salčin", te Osmu osnovna škola "Amer Čenanović", a turnir je svečano otvorio načelnik Općine Ilidža Nermin Muzur.

Najbolje plasiranim uručene su nagrade, pehari, medalje i posebna priznanja za najperspektivnije igrače.

Veliki broj učesnika pohvalio je domaćina i organizatora turnira koji je očito dobio visoku ocjenu, što ga obavezuje da naredni Basket Cup na Ilidži bude još bolji i masovniji.



Općina Ilidža izdvojila 22.000 KM

BESPLATNA ŠKOLA PLIVANJA ZA UČENIKE ČETVRTIH RAZREDA OSNOVNIH ŠKOLA



Općina Ilidža potpisala je Sporazum sa Javnim preduzećem Olimpijski bazen Otoka o sufinansiranju besplatne škole plivanja za učenike četvrtih razreda osnovnih škola s područja općine Ilidže za školsku 2021./2022. godinu.

Cilj ove škole je obučiti djecu osnovnim elementima plivanja i na taj način smanjiti broj neplivača.

Za realizaciju ovog Sporazuma Općina Ilidža je izdvojila 22.000 KM, i to iz namjenskih nepovratnih grantova za realizaciju Projekta škole plivanja.

Ostali troškovi Projekta finansirat će se iz sredstava Budžeta Kantona Sarajevo za 2021. godinu.

Nermin Muzur, Adnan Šteta i Selmir Kovač u posjeti poznatom sarajevskom izletištu

OBNOVLJENE ULICE I PUTEVI NA STOJČEVCU



Prvi radovi na revitalizaciji Stojčevca startali su još početkom 2022. godine

U društvu ministra saobraćaja KS Adnana Šteta i direktora Direkcije za puteve KS Selмира Kovača, načelnik Općine Ilidža Nermin Muzur, obišao je 5. aprila radove na Stojčevcu.

Prvi radovi na revitalizaciji Stojčevca počeli su još početkom ove godine uklanjanjem starog asfalta na saobraćajnicama unutar izletišta. Potom je sa Stojčevca uklonjena velika količina smeća, potkresane su vočke i iskrčen zarasli teren, te je puštena u rad i nova javna rasvjeta, da bi se 5. aprila okončali i asfaltni radovi unutar Stojčevca.

Ministar saobraćaja KS Adnan Šteta bio je zadovoljan radovima koji su obavljani na lokalitetu Stojčevca.

- Zahvaljujući naporima načelnika Muzura i uz podršku svih

institucija koje su prepoznale važnost ovog projekta, Stojčevac će vratiti nekadašnji sjaj. Ministarstvo saobraćaja putem Direkcije za puteve KS učestvuje u finansiranju ovog projekta u iznosu od 340.000 KM - naveo je ministar Šteta.

Načelnik Muzur zahvalio se svima na podršci.

- Veliku zahvalnost za pomoć dugujemo Ministarstvu saobraćaja KS i ministru Adnanu Šteti, Ministarstvu komunalne privrede, infrastrukture, prostornog uređenja, građenja i zaštite i ministru Enveru Hadžiahmetoviću, Direkciji za puteve KS i direktoru Selmiru Kovaču, te KJU za zaštićena prirodna područja i direktoru Asadu Jeleškoviću, dok posebne zasluge za cijelu priču oko Stojčevca idu na račun Elvise Vrete - kazao je načelnik Muzur, uz opasku da je ovo samo prva faza obnove Stojčevca.

Potpisan Sporazum između Općine Ilidža i Direkcije za puteve Kantona Sarajevo o pokretanju javne nabavke

IZGRADNJA KRUŽNOG TOKA U BUTMIRU

Načelnik Općine Ilidža Nermin Muzur i direktor Direkcije za puteve Kantona Sarajevo Selmir Kovač potpisali su 18. aprila Sporazum o zajedničkom pokretanju postupka javne nabavke "Izgradnja kružne raskrsnice u Butmiru".

- Kroz ovaj projekt riješit ćemo nešto što stanovnici naselja Butmir dugo očekuju, a za koji su iskazali potrebu i kroz javnu raspravu o Nacrtu budžeta Općine Ilidža za 2022. godinu, označivši ga kao prioritetan. Nadam se da ćemo na ovaj način saobraćajnicu učiniti sigurnijom, te dodatno smanjiti gužve u saobraćaju - rekao je načelnik Muzur.

Načelnik Općine Ilidža naglasio je kako ima odličnu saradnju sa Direkcijom za puteve KS i Ministarstvom saobraćaja KS te resornim ministrom Adnanom Šetom.

- Naš cilj je razvijanje i maksimalno poboljšanje cestovne infrastrukture u svim općinama. Uz započete krećemo i sa



realizacijom novih projekata, koji će dugoročno riješiti pitanje gužvi i unaprijediti kvalitet života - naglasio je ministar Šteta.

Vrijednost Sporazuma je 390.000 KM, od čega će Direkcija za puteve osigurati 300.000 KM, a Općina Ilidža ostatak iznosa.

Ilidžanka dobila priliku da svoj rad predstavi i dalje razvija u Sjedinjenim Američkim Državama

PODRŠKA ZA APLIKACIJU ENE KAPETANOVIĆ

Ilidžanka Ena Kapetanović (27) izradila je aplikaciju koja će biti velika pomoć ljudima s problemima u kretanju da prevaziđu sve fizičke prepreke s kojima se svakodnevno susreću.

Svoju aplikaciju Ena je predstavila u New Yorku, i to kroz BOLD program koji finansira Ambasada SAD u BiH, a njen put u Sjedinjene Američke Države podržala je i Općina Ilidža.

- Naš fokus je na mladima. Zbog toga mi je drago vidjeti mlade ljude koji žele mijenjati svoju životnu sredinu nabolje te je prilagođavati sebi kroz vlastiti rad - rekao je načelnik Općine Ilidža, Nermin Muzur, te je naglasio da bi svaka lokalna zajednica u našoj zemlji trebala imati aplikaciju poput Enine kako bi stvarno pokazali da vodimo brigu o ljudima koji imaju poteškoće u kretanju i kako bi za njih otklonili sve prepreke i barijere.

Kapetanović se zahvalila načelniku Muzuru što je pokazao interes za njenu aplikaciju, kao i na pomoći pri odlasku u SAD.



Ena Kapetanović i načelnik Muzur

Pripremni radovi za trasu buduće travmajske pruge od Ilidže do Hrasnice

IZVAĐENA STABLA SA ZELENOG POJASA



Krajem marta 2022. uklonjena su stabla vočki

Javno preduzeće Ilidža uspješno je obavilo još jedan dio pripremnih radova za buduću dionicu tramvajske pruge od Ilidže do Hrasnice.

Sa zelenog pojasa, kojim će ići trasa buduće tramvajske pruge, izvađena su sva stabla vočki i to nakon što su ih prethodno detaljno pregledali stručnjaci iz KJKP Park Sarajevo.

Sve vočke koje su se nalazile na trasi od početka Butmirske ceste do kružnog toka u Sokolović Koloniji, a koje su nakon vađenja označene kao zdrave, pronašle su svoje mjesto u baštama i avlijama građana Ilidže.

Ovu akciju sprovela je Općina Ilidža zahvaljujući svim mjesnim zajednicama.

Načelnik Muzur obišao najstarije stanovnike općine Ilidža i uručio im simboličan novčani iznos

POMOĆ ZA OSOBE STARIJE OD 80 GODINA

Načelnik Općine Ilidža, Nermin Muzur, obišao je građanke i građane Ilidže starije od 80 godina, te im uručio simboličnu novčanu pomoć. Za ovaj program, koji Općina Ilidža realizuje preko Stručne službe za koordinaciju rada mjesnih zajednica, izdvojeno je ukupno 157.430 KM.

Od ukupno 2.249 stanovnika Ilidže starijih od 80 godina, načelnik Muzur je pojedine želio lično posjetiti, te u razgovoru s njima čuti njihove potrebe, želje ali i ideje.

- Nastojimo, koliko god smo u mogućnosti, da mislimo na sve naše sugrađane. Posebno želimo pomoći starijim osobama, koje su kroz svoj životni i radni vijek aktivno doprinosile razvoju naše lokalne zajednice - kazao je načelnik Muzur.

Tokom posjete jednoj od ustanova koje vode brigu o osobama treće životne dobi, njeni korisnici bili su iznenađeni posjetom načelnika kojem su kazali da im posjeta i pažnja ne znače ništa manje od novčanog iznosa kojeg su dobili, te su mu uputili poziv za novo druženje.



U posjeti ustanovi koja vodi brigu o osobama treće životne dobi

- Pozitivna energija ovih ljudi me zaista iznenadila. Od njih se ima šta čuti i naučiti. Zakazali smo i novo druženje, uz kafu, poslije ramazana - kazao je Muzur.

Naglasio je i da će Općina Ilidža i u narednom periodu nastojati da pokaže senzibilitet prema svim građanima Ilidže, naravno u skladu sa svojim mogućnostima.

Općina Ilidža donirala namjenska sredstva za opremanje sale za borilačke sportove i teretane

POMOĆ ZA POLICIJSKU AKADEMIJU FMUP-A



Obnovljena sala za borilačke sportove Policijske akademije FMUP-

Načelnik Općine Ilidža Nermin Muzur posjetio je Policijsku akademiju Federalnog ministarstva unutrašnjih poslova (FMUP), a ovu izuzetno važnu ustanovu s njim su posjetili i federalni ministar unutrašnjih poslova Aljoša Čampara i načelnik Općine Novo Sarajeva Hasan Tanović.

Općina Ilidža, baš kao i Općina Novo Sarajevo, u proteklom periodu donirale su FMUP-u namjenska sredstva za opremanje sale za borilačke sportove i teretane u Policijskoj akademiji FMUP-a, što se direktno odrazilo na poboljšanje kvaliteta obuke polaznika osnovne policijske obuke.

Šef Odsjeka za osnovnu policijsku obuku u Policijskoj akademiji FMUP-a Nusret Beširević zahvalio se načelnicima Muzuru i Tanoviću što doprinose jačanju sigurnosnog sistema u BiH.

Načelnici Muzur i Tanović iskazali su spremnost da i u budućnosti podrže projekte koji se odnose na osnaživanje Policijske akademije FMUP-a poput izgradnje poligona pješačkih prepreka i multifunkcionalnog parka za vježbanje polaznika osnovne policijske obuke.

- Od prvog dana mandata nastojim na najbolji način sarađivati i pomagati rad naše policije, pogotovo kada je riječ o Petoj policijskoj upravi KS - rekao je načelnik Muzur, te dodao:

- Općina Ilidža finansijski je pomogla nabavku novih sprava neophodnih za školovanje kadeta, na šta sam izuzetno ponosan, posebno zbog činjenice da je ova institucija odškolovala brojne ljude koji su bili temelj u odbrani Bosne i Hercegovine tokom agresije.

Savjetnik za borbu protiv korupcije pohvalio napore Općine Ilidža u borbi protiv korupcije

TREĆA POSJETA LARSONA OPĆINI ILIDŽA

U novoj posjeti načelniku Općine Ilidža, Nerminu Muzuru i rukovodstvu Općinskog vijeća, već treći put bili su savjetnik za borbu protiv korupcije Erik Larson i šef Ureda za borbu protiv korupcije i upravljanja kvalitetom KS Erduan Kafedžić.

Načelnik Muzur izrazio je zadovoljstvo ponovnom posjetom i naglasio da Općina Ilidža nastavlja sa rješavanjem problema koji su se godinama gomilali, te kako su sve aktivnosti razvoja usmjerene na poštivanje zakona i propisa.

- Najveći izazovi su pritisci sa kojima se svakodnevno susrećemo jer se sistemski borimo protiv korupcije. Izuzetno nam je drago što u ovoj borbi imamo podršku Ambasade SAD, Ureda za borbu protiv korupcije i upravljanja kvalitetom KS i gospodina Larsona, koje smo informisali o svim aktivnostima, ali i o konkretnim pritiscima sa kojima se susrećemo - istakao je načelnik Muzur.

Savjetnik za borbu protiv korupcije, Erik Larson, istakao je da je Općina Ilidža svjetla tačka i jedan od najboljih primjera u borbi protiv korupcije.



Larson i Kafedžić sa općinskim rukovodstvom

- Građani i građanke trebaju znati koliko se žarko borite za njih, vi ne samo da radite već ste se zauzeli za stanovnike u ovoj općini, na šta mnogi nisu spremni. Želim pohvaliti napore Općine u borbi protiv korupcije i naglasiti da ljudi koji se bore protiv korupcije ne trebaju biti pod pritiskom već trebaju biti zaštićeni - naglasio je Larson.

Drugog dana Ramazanskog bajrama Općina Ilidža obilježila Dan šehida

BAJRAMSKE HEDIJE ZA SUPRUGE ŠEHIDA

Drugog dana Ramazanskog bajrama u Multifunkcionalnoj sali Općine Ilidža upriličen je prijem za članove šehidskih porodica. Nakon što su prošle godine bili roditelji, ovoga puta načelnik Općine Nermin Muzur ugostio je supruge šehida rođene 1950. godine i starije, a susret s njima organizovala je Organizacija porodica šehida i poginulih boraca Općine Ilidža.

Uz simbolične bajramske hedije, načelnik Muzur poručio je svojim gošćama kako su vrata Općine za njih uvijek otvorena.

- Održao sam proteklih godina mnogo političkih govora, ali pred vama i u ovakvim prilikama teško je kontrolisati emocije. Izuzetno je teško nositi tugu i bol zbog gubitka najmilijih. Ipak, znajte da je Općina Ilidža uvijek tu i da su naša vrata za vas uvijek otvorena - poručio je načelnik Muzur.

U džamijama i na mezarjima na teritoriji općine Ilidža proučen je Jasin-i-Šerif, a počast poginulim u agresiji na BiH odata je



Prijem u Multifunkcionalnoj sali

učenjem Fatihe i polaganjem cvijeća. Delegaciju Općine predvodio je načelnik Muzur sa predsjedavajućim Općinskog vijeća Tarikom Stambolićem i zamjenikom Redžom Lemezanom.

Zbog dotrajalosti, ali i zbog sigurnosti građana, Općina Ilidža odlučila obnoviti drvored u MZ Lužani

NOVE SADNICE U ULICI JAHIJELA FINCIJA



Zamijenjena stara stabla

Stari drvored u dijelu ulice Jahijela Fincijsa zamijenila su nova mlada stabla. Zbog dotrajalosti, ali i zbog sigurnosti građana, Općina Ilidža odlučila je obnoviti ovaj drvored.

Radove na zamjeni starih stabala obišao je i predsjedavajući Općinskog vijeća Ilidža, Tarik Stambolić, te je i sam dao doprinos sadnji novog drveća.

Predsjedavajući Stambolić naglasio je kako zelene površine na teritoriji općine Ilidža treba redovno održavati jer je ona istinska zelena oaza Sarajeva koju trebamo čuvati u svakom smislu.

- S uređenjem zelenih površina i sadnjom novih stabala nastaviti ćemo i u narednom periodu u što će se stanovnici Ilidže vrlo brzo moći uvjeriti - kazao je Stambolić.

Općina Ilidža nastavila s programom dodjele poljoprivrednog zemljišta građanima na privremeno korištenje

BESPLATNE PARCELE ZA PROLJETNU SJETVU

Načelnik Općine Ilidža Nermin Muzur potpisao je ugovore za dodjelu poljoprivrednog zemljišta na privremeno korištenje za proljetnu sjetvu sa 29 korisnika.

Ove godine Općina Ilidža je na prostoru Mjesne zajednice Osjek na korištenje dodijelila oko 8,5 dunuma zemljišta, a kroz finansiranje pripreme zemljišta za sjetvu nastojala je građanima smanjiti dodatne troškove uređenja parcela koje su dobili na privremeno korištenje.

- Nakon što je pandemija koronavirusa proteklih godina imala negativne posljedice na poljoprivrednu proizvodnju, ove godine će se one manifestovati kao rezultat enormnog rasta cijena na globalnom tržištu - rekao je načelnik Općine Ilidža Nermin Muzur, te naglasio:

- Drago mi je što je i ove godine postojao veliki interes za zemljište koje je Općina Ilidža besplatno dodjeljivala na privremeno korištenje putem Javnog poziva. U odnosu na prošlogodišnjih 19, ove godine smo odobrili 29 ugovora o



29 korisnika potpisalo ugovore sa Općinom

privremenom korištenju zemljišta, što je pokazatelj da interes građana postoji. To znači da ovaj program ima perspektivu te da ćemo i u budućnosti realizirati programe u interesu građana.

Zemljište koje je dodijelila Općina podijeljeno je na parcele veličine između 200 do 300 kvadratnih metara, a prema ugovoru građani će ga moći koristiti do kraja novembra ove godine.

Tokom agresije na Bosnu i Hercegovinu u njenom glavnom gradu četnički zločinci ubili su 1.601 dijete

DELEGACIJA OPĆINE ILIDŽA ODALA POČAST UBIJENOJ DJECI OPKOLJENOG SARAJEVA

Delegacija Općine Ilidža, koju je predvodio načelnik Nermin Muzur, odala je počast ubijenoj djeci opkoljenog Sarajeva.

Tokom agresije na Bosnu i Hercegovinu njen glavni grad bio je pod opsadom 1.425 dana, a za to vrijeme četnički zločinci ubili su 1.601 dijete.

Odlukom Vlade Kantona Sarajevo od 5. septembra 2019. godine 5. maj obilježava se kao Dan sjećanja na ubijenu djecu Sarajeva.

Počast najmlađim Sarajlijama ubijenim tokom agresije osim roditelja i članova njihovih porodica odale su delegacije Predsjedništva Bosne i Hercegovine, Federacije BiH, Grada Sarajeva, Vlade Kantona Sarajevo i brojne druge.

Osim načelnika Muzura u delegaciji Općine Ilidža bili su i zamjenici predsjedavajućeg Općinskog vijeća Ilidža, Samir Avdić i Redžo Lemezan.



Opsada bh. prijestolnice trajala je 1.425 dana

Obilježena 30. godišnjica Dana odbrane Ilidže



Sjećanje na 22. april 1992. godine

U znak sjećanja na 22. april 1992. godine, učenjem Fatihe i polaganjem cvijeća na više lokacija na području općine Ilidža obilježena je 30. godišnjica jedne od najvažnijih bitaka za Ilidžu, ali i Sarajevo.

Centralna manifestacija u organizaciji Patriotske lige Općine Ilidža i Udruženja 4. Viteška motorizovana brigada Ilidža, kao i Svečana sjednica Savjeta MZ Sokolović Kolonija, koja 22. april slavi kao Dan mjesne zajednice, održana je u prostorijama Pete osnovne škole u Sokolović Koloniji. Tokom manifestacije na kojoj je obilježena i 30. godišnjica odreda "22. april - 3. Motorizovani bataljon", počast šehidima i poginulim borcima odali su članovi njihovih porodica kao i brojne delegacije boračkih udruženja, političkih partija kao i građani općine Ilidža.

- Uvijek mi je najteže govoriti na teme koje se tiču ratnih dešavanja, na njih je teško ostati ravnodušan kada znamo kakvu smo žrtvu podnijeli. Zbog toga veliko hvala našim šehidima i poginulim borcima, njihovim porodicama kao i najhrabrijim bosanskohercegovačkim sinovima i kćerima zahvaljujući kojima stojimo ovdje - rekao je načelnik Općine Ilidža, Nermin Muzur.

Prošlo je 29. godina od Bitke za Koščan



Tradicionalni marš brojao oko 200 učesnika

STAZAMA HRABRIH RAKOVIČKIH BORACA

Manifestacijom "Odbrana Koščana" obilježena je 29. godišnjica Bitke za Koščan, a održan je i tradicionalni marš Stazama rakovičkih boraca.

Učenjem Fatihe i polaganjem na spomen-obilježju u Rakovici odata je počast šehidima i umrlim borcima, a program obilježavanja ovog historijski izuzetno važnog događaja za Ilidžu tokom agresije na Bosnu i Hercegovinu prisustvovali su članovi našeg Udruženja boraca veterana Rakovice, ASK Aquila, Planinarsko društvo Rakovica 2009, Odred izviđača Rakovica 09, učenici Devete osnovne škole, te mnogobrojni građani i gosti.

Tradicionalni marš Stazama rakovičkih boraca, u kojem je učestvovao član Općinskog vijeća Ilidža Amar Bungur, brojao je oko 200 učesnika, da bi se na lokalitetu Torina spojila sa kolonom iz Lepenice i Kiseljaka.

Kroz kraće obraćanje učesnici koščanskih bitaka iz Rakovice i Lepenice prisutnima su prepričali ratna dešavanja na ovom lokalitetu i njihov značaj za rejon Koščana ali i druge prostore.



Učenici Prve i Pete osnovne škole uveličali početak radova na historijskom projektu

Radovi na rekonstrukciji ratnog puta preko Igmana započeli su 26. maja, a Nermin Muzur, načelnik Općine Ilidža i Adnan Šteta, ministar saobraćaja Kantona Sarajevo, naglasili su da je ovo historijski gledano najvažniji projekt zbog izuzetno važne uloge koju je ova putna komunikacija imala tokom agresije na Bosnu i Hercegovinu.

- Često smo tokom rata mogli čuti priču kako bi ovaj put trebalo pozlatiti s obzirom na ulogu i značaj koji je imao za vrijeme agresije. Nažalost nakon završetka rata dospio je u drugi plan, iako je bio žila kucavica za sve nas na ovim prostorima, a pogotovo za glavni grad naše domovine - rekao je načelnik Općine Ilidža, Nermin Muzur, te dodao:

- Zbog godina nismo mogli pripadati generaciji koja je branila i odbranila ove prostore i zahvaljujući kojoj je Bosna i Hercegovina opstala, ali svojim djelima želimo ostati upisani kao generacija koja je gradila svoju domovinu. Za sve nas je važno da pripadamo onoj generaciji koja će moći reći da je napravila nešto

od onoga što nam je ostavljeno u amanet. Ova putna komunikacija je naš najvažniji projekt, usudim se reći historijski.

O rekonstrukciji puta u dužini od 2.964,8 metara govorio je i ministar Šteta, a Okvirni sporazum u vrijednosti 3.850.000 KM potpisan je na tri godine.

- Ratni put Igman, simbol otpora i spasa, je višestruko značajan, kako zbog svoje historije, tako i zbog povezivanja tri općine našeg kantona. Trenutno je ovaj put potpuno neuslovan, a izgradnjom novog, dobit ćemo potpuno nova tri kilometra puta. Izuzetno sam zadovoljan saradnjom sa Općinom Ilidža, koja na svakom od projekata pokazuje efikasnost i kvalitet - kazao je ministar saobraćaja KS, Adnan Šteta.

O važnosti ratnog puta govorili su i Nazim Mahmutović i Rifat Hodžić, koji su, svaki na svoj način, bili angažovani na simbolu otpora agresoru, a okupljene na lokaciji "Osmice" muzičkim numerama počastili su učenici Prve i Pete osnovne škole.

Nakon dvogodišnje pauze na tradicionalnom takmičenju učestvovalo je 16 ekipa iz BiH i Crne Gore

ODRŽANE IZVIĐAČKE MAJSKE IGRE



Ilidža domaćin dvodnevnom takmičenju

Tradicionalne Izviđačke majske igre održane su nakon dvogodišnje pauze u organizaciji Odreda izviđača Igman 92. Na takmičenju je učestvovalo 16 ekipa iz Bosne i Hercegovine i

Crne Gore, uzrasta od 15 do 20 godina, a odmjerile su snage u tradicionalnim izviđačkim disciplinama – boravku i snalaženju u prirodi, orijentaciji i topografiji.

Prvo mjesto na dvodnevnom takmičenju, koje je počelo u subotu 28. maja, osvojila je ekipa "Bijelo dugme" (OI "Safet Ribić" Nemila). Druga pozicija pripala je timu "Ko kosu vodi a ko nosi" (OI Visoko), dok je Team Alpha (OI Lisac Zenica) bio trećeplasirani.

Takmičenje je počelo na obali rijeke Željeznice, u blizini Rustem-pašinog mosta, a staza je obuhvatala šire područje Ilidže, uključujući Vrelo Bosne i Stojčevac, te obilazak znamenitosti ovog područja.

Zatvaranje Izviđačkih majskih igara i proglašenje pobjednika održano je u nedjelju, 29. maja, ispred Doma kulture u Hrasnici.

Objedinili sredstva i tako udvostručili izdvajanja



Načelnik Muzur i direktor Bešić potpisali ugovor

OPĆINA ILIDŽA I KULT PODRŠKA MLADIMA

Načelnik Općine Ilidža, Nermin Muzur, i generalni direktor Instituta za razvoj mladih KULT, Jasmin Bešić, potpisali su ugovor o partnerstvu, kroz koji će umjesto dosadašnjih 30.000 KM za implementaciju projekata za mlade biti izdvojeno ukupno 60.000 KM.

Općina Ilidža i Institut za razvoj mladih KULT objedinili su sredstva te će zajedno nastojati poboljšati procedure dodjele javnih sredstava organizacijama koje se bave pitanjima mladih ali i potaknuti implementaciju projekata za mlade koji će doprinijeti poboljšanju njihovog položaja na području općine Ilidža.

Osim dodjele grantova omladinskim organizacijama, kroz potpisane ugovore planirane su i druge aktivnosti koje se odnose na procjenu i jačanje kapaciteta u omladinskim organizacijama kroz različite seminare, obuke, ali i na sve ono za čime mladi iskazu potrebu.

Pored Općine Ilidže za učešće u ovom projektu ugovori su potpisani s predstavnicima Teslića, Banje Luke i Tuzle.

- Dosta pažnje posvetili smo i posvećujemo mladima i to će sasvim sigurno ostati naša orijentacija i opredjeljenje. Moram se zahvaliti Institutu za razvoj mladih KULT i direktoru Bešiću na iznimnoj saradnji za koju vjerujem da će dodatno rasti i napredovati - kazao je načelnik Muzur.

Direktor Instituta za razvoj mladih KULT, Jasmin Bešić, na dosta slikovit način je objasnio zašto je baš Općina Ilidža među lokalnim zajednicama koje su odabrane za učešće na ovom projektu.

- Od 28 lokalnih zajednica mi smo odabrali najbolje za učešće na ovom projektu, a jedna od četiri najbolje je Općina Ilidža. Nismo se vodili principom da uvijek treba pomoći najslabijim učenicima, već onim najboljim i najtalentovanijim - rekao je Bešić.

Općina Ilidža već neko vrijeme je naklonjena mladima, što potvrđuju i riječi načelnika Muzura. Načelnik je naglasio da od njegovog dolaska Općina kroz plan i program želi biti naklonjena mladima, odnosno imati status "Youth Friendly" općine.

- Kada smo htjeli da to i postanemo, nismo mogli naći konkretno značenje i kriterije koje trebamo ispuniti da bi i zvanično dobili taj status. Upravo smo u saradnji s KULT-om napravili prve korake na razvijanju tog modela - naglasio je načelnik Muzur.

Aktivnosti i projekti osnovnih škola za 2022. godinu



Općina Ilidža nastavlja realizirati aktivnosti za učenike i osnovne škole s područja Ilidže, zbog čega je Služba za obrazovanje, kulturu, sport i mlade održala sastanak s Aktivom direktora osnovnih škola.

Glavna tema radnog sastanka, kojem je prisustvovao i Haris Topalović, direktor Javne ustanove Kulturno-sportski i rekreacioni centar Ilidža, bile su aktivnosti i projekti koji su planirani za ovu godinu, a sastanak je rezultirao dogovorom oko organizacije općinskih takmičenja u timskim sportovima.

Zbog činjenice da na Ilidži trenutno djeluju četiri kluba sa statusom premijerligaša (ŽOK Igman, OK Ilidža, ŽRK Ilidža, OKK Spars Ilidža), donesena je odluka da će se učenici osnovnih škola nadmetati u odbojci i rukometu. Takmičenja će ujedno biti i podrška ilidžanskim premijerligašima u omasovljenju njihovih omladinskih pogona.

Također, dogovorena je organizacija tradicionalne posjete Memorijalnom centru Potočari, a planirano je da oko 700 učenika osmih razreda u organizaciji Općine Ilidža posjeti Potočare.

Na radnom sastanku Aktiv direktora informisan je i o budžetskim sredstvima koje je Općina planirala za ilidžanske osnovne škole. Ova sredstva planirana su za pomoć odlasku osnovaca na ekskurziju, ali i kao podrška bibliotečkom fondu i za poklone prvačicima.

Direktori osnovnih škola izrazili su veliku zahvalnost Općini Ilidža na konstantnoj pomoći u realizaciji nastavnih planova i aktivnosti, kao i poboljšanju uslova boravka i rada u školama.

Finansiranje i sufinansiranje programskih aktivnosti

SPORAZUMI SA 19 BORAČKIH UDRUŽENJA

Nakon sprovedenog Javnog poziva za finansiranje i sufinansiranje programskih aktivnosti, načelnik Nermin Muzur potpisao je sporazume sa 19 boračkih udruženja za koje je iz Budžeta za 2022. godinu odobreno ukupno 170.000 KM.

Ovom prilikom načelnik Muzur je razmijenio određene ideje i zamisli s predstavnicima boračkih udruženja, a poseban akcent stavljen je na bitne datume tokom agresije na BiH.

- Kao i u svakoj oblasti života, tako i u radu boračkih udruženja postoji prostor za dodatni napredak, a Općina Ilidža neće biti kamen spoticanja na tom putu - kazao je načelnik Muzur.

Na poznatom sarajevskom izletištu obilježena jubilara 30. godišnjica Bitke za Stojčevac

BROJ OKUPLJENIH KAO JASNA PORUKA SVIMA



Obilježen je i Dan Drugog motorizovanog bataljona Četvrte viteške motorizovane brigade

Trideseta godišnjica Bitke za Stojčevac obilježena je na poznatom sarajevskom izletištu, baš kao i Dan Drugog motorizovanog bataljona Četvrte viteške motorizovane brigade.

Na ovom lokalitetu 14. i 15. maja 1992. godine hrabrošću i odlučnošću bosanskohercegovačkih patriota iz Kovača i Hrasnice agresor je spriječen da ovlada ratnim putem preko Igmana, koji je bio žila kucavica opkoljenog Sarajeva sve do završetka rata.

Nakon učenja Fatihe i polaganja cvijeća na Spomen-obilježju šehidima i poginulim borcima u Hrasnici i na mezarju Kovači, prigodnim kulturno-historijskim programom na Stojčevcu obilježena je jubilara godišnjica legendarne bitke.

Prisjećajući se dešavanja od 15. maja 1992. godine, tada 19-godišnji Samir Muslić, kazao je kako je na putu preko Igmana pronađeno pola tone eksploziva kojim je trebala biti minirana ova putna komunikacija.

Veliki broj učesnika Bitke za Stojčevac, njihovih porodica i pripadnika Armije Republike Bosne i Hercegovine, kao i građana Ilidže, okupio se podno Igmana i tako uvećao jubilaru godišnjicu.

- Govoriti pred ljudima na dan kada su svojom hrabrošću i odlučnošću stali pred nadmoćnijeg, naoružanijeg i opremljenijeg neprijatelja, te ga spriječili da zauzme ovaj strateški izuzetno važan lokalitet, nije lako, a za mene je i izuzetno emotivno - kazao je načelnik Općine Ilidža, Nermin Muzur.

Svi okupljeni na Stojčevcu prisjetili su se velike žrtve bh. partioti, njihove herojske borbe i odali počast svima koji su poginuli braneći ovaj lokalitet 14. i 15. maja 1992. godine, ali i svim pripadnicima Drugog motorizovanog bataljona Četvrte viteške motorizovane brigade koji su položili živote u odbrani jedine nam domovine.

- Trideseta godišnjica obilježavanja Dana bitke za Stojčevac u svakom od nas budi uspomene na rat, na naše voljene koji su živote i dijelove tijela ugradili u naš opstanak. Ono što me raduje i veseli, jeste da smo ovu jubilaru godišnjicu bitke kojom je odbranjen ratni put preko Igmana, obilježili na Stojčevcu čiji je izgled posve promijenjen u odnosu na prošlu godinu - poručio je načelnik Muzur, te dodao:

- Broj okupljenih ljudi svih generacija jasna je poruka svima da dok nas bude, dok naša riječ bude vrijedila nešto, do tada će se ova izuzetno važna godišnjica obilježavati.

Održan tradicionalni Memorijalno-historijski susret "Odbrana Ilidže 2"

SJEĆANJE NA NEZAMPĆEN ZLOČIN

U organizaciji Unije veterana Općine Ilidža održan je tradicionalni Memorijalno-historijski susret "Odbrana Ilidže 2", kojem je prisustvovala i delegacija Općine Ilidža koju su predvodili načelnik Nermin Muzur, predsjedavajući OV Ilidža Tarik Stambolić i njegov zamjenik Samir Avdić.

Prije 30 godina, u neposrednoj blizini Ljetne pozornice, desio se nezapamćen zločin. Tog 15. maja 1992. godine agresorske snage su zaustavile transporter UNPROFOR-a koji je preko okupiranog dijela Ilidže u koševsku bolnicu prevezio teško ranjene Jagodu Galešić, Anesa Bučana, Seada Hodžića, Ramu Husrefa i Ismeta Osmanovića te ih izvukle iz vozila i zvjerski ubile.

Živote u jednoj od presudnih bitaka za odbranu Ilidže 14. i 15. maja 1992. dali su i Sado Agović, Edin Berilo, Ivan Brkić, Jasmin Čehić, Salko Dedić, Elmir Džaferović, Avdulj Feratović, Nedžad Granulo, Samir Hasanbegović, Asim Holjan, Smail Hrnjičić, Eniz Husić, Elzedin Kahvić, Husein Kurudija, Mujo Lindov, Hilmo Lokvančić, Sead Memija, Nihad Mulaosmanović, Murat Mušanović, Ibrahim Muzur, Haris Opanković, Rasim Suljević i Esad Zorlak.

Učenjem Fatihe i polaganjem cvijeća počast poginulim odali su članovi njihovih porodica, boračka udruženja i građani, a za prigodan kulturno-historijski program pobrinuli su se učenici i nastavnici Prve osnovne škole.

Na 14. redovnoj sjednici Općinskog vijeća usvojena Strategija razvoja Općine Ilidža 2022. - 2027. godina

OPĆINA ILIDŽA - MJESTO GDJE IZVIRE ŽIVOT, STANUJE ZDRAVLJE I ŽIVI ZNANJE



Svi vijećnici OV Ilidža su glasali za usvajanje Strategije razvoja Općine Ilidža 2022. - 2027. godina

Na 14. redovnoj sjednici Općinskog vijeća Ilidža jednoglasno je usvojena Strategija razvoja Općine Ilidža za period 2022. - 2027. godina.

Načelnik Nermin Muzur prisutnima članovima Općinskog vijeća predstavio je sadržaj i viziju općine u budućnosti: Ilidža 2027. - Mjesto gdje izvire život, stanuje zdravlje i živi znanje.

- Naš cilj da prednosti i potencijale koje imamo valorizujemo kroz strategije, budžete i projekte te na najbolji način eksploatišemo ovu priču. Ostvarenje razvoja ove vizije realizovat će se kroz tri strateška cilja: unapređenje konkurentnosti i samoodrživosti lokalne privrede, unapređenje kvaliteta društvenog života stanovništva općine, i odgovorno upravljanje okolinom i razvojem infrastrukture - rekao je, između ostalog, načelnik Muzur.

Podrška u procesu izrade Strategije razvoja Općine Ilidža osigurana je kroz "Projekt unapređenja efikasnosti lokalnih usluga (PIPLS) u Bosni i Hercegovini", a u okviru potkomponente projekta "Inicijativa za jačanje kapaciteta novoizabranih načelnika/gradonačelnika". Projekt finansira Švedska, a sufinansira i provodi Razvojni program Ujedinjenih nacija u Bosni i Hercegovini (UNDP) u saradnji sa jedinicama lokalne samouprave.

Situaciona analiza, kao preduslov za izradu Strategije, izrađena je uz podršku Britanske ambasade.

Pored tri strateška cilja, devet prioriteta i 25 mjera, definisano je i šest strateških projekata na čijoj realizaciji će se raditi, a to su: Ilidžanska tehnološka dolina, Ilidža - prva turistička destinacija u Bosni i Hercegovini, Regionalni univerzitetski hub, Futura - infrastruktura za novo doba, sportski šampion države i Dekarbonizacija Ilidže.

Do 2030. godine Općina Ilidža planira formirati tehnološku dolinu

koristeći naučno-istraživačke, ljudske i infrastrukturne potencijale tri univerziteta s područja općine Ilidža, a u saradnji s vodećim domaćim i međunarodnim tehnološkim kompanijama, kao i višim nivoima vlasti u Bosni i Hercegovini.

Istovremeno, integrisana turistička inicijativa do 2030. godine trebala bi Ilidžu učiniti najpoželjnijom turističkom destinacijom u Bosni i Hercegovini, a koja će uključivati različite tipove turizma.

Stvarajući sarajevsku tehnološku dolinu, tri univerziteta koji se nalaze na Ilidži će postati najpoželjnije obrazovne institucije u regiji, a Općina će promovisati Ilidžu kao najpoželjniju destinaciju za život mladih ljudi.

Inicijativa Ilidža Futura - infrastruktura za novo doba, koja će Ilidži dati novo lice, uključuje sveobuhvatnu transformaciju infrastrukture, od izgradnje pruge Ilidža - Hrasnica, izgradnje i rekonstrukcije trgova pa do rekonstrukcije ratnog puta preko Igmana i revitalizacije Stojčevca.

Općina Ilidža do 2030. godine želi postati sinonim za sportske uspjehe i događaje na nacionalnom i regionalnom nivou. Kroz ulaganje u izgradnju sportske infrastrukture, poput Sportske dvorane Hrasnica, rekonstrukcije stadiona Famosa, izgradnje Sportsko-rekreativnog centra za djecu i mlade kod rijeke Željeznice želja je stvoriti preduvjete za stvaranje šampionskih timova.

Implementacijom niza inicijativa do 2030. godine planirano je smanjenje emisije negativnih čestica kako bi zaštitili zdravlje stanovnika. Praćenje kvalitete zraka, nabavka novih analizatora za mjerenje zagađujućih materija u zraku, primjena mjera energetske obnove i podsticanje stanovništva u korištenju obnovljivih izvora energije samo su neke od inicijativa koje bi trebale rezultirati zdravijim životnim okruženjem za stanovnike Ilidže.

Podrška Općine Ilidža Memorijalnom centru planirana je kao stavka u Budžetu za 2022. godinu

IZDVOJENO 50.000 KM ZA MC SREBRENICA

Načelnik Općine Ilidža, Nermin Muzur, je u Srebrenici prisustvovao konferenciji "Genocid i Srebrenica: Saradnja za istinu" koju je organizovao Memorijalni centar Srebrenica.

Konferenciju koja je okupila premijere, gradonačelnike i načelnike, načelnik Općine Ilidža Nermin Muzur iskoristio je i za potpisivanje sporazuma kojim će Općina Ilidža sa 50.000 KM podržati rad Memorijalnog centra.

- U prošloj godini podržali smo rad Memorijalnog centra sa 25.000 KM, a ove godine smo odlučili povećati taj iznos na 50.000 KM, što su sredstva koja su osigurana kroz Budžet Općine Ilidža za 2022. godinu. Nastojat ćemo, ako se ukaže potreba, da taj iznos i raste, te da nikad ne bude manji u odnosu na sredstva izdvojena u prethodnoj godini - kazao je načelnik Muzur.

Pored ugovora o dodjeli sredstava, načelnik Muzur, potpisao je i Memorandum o saradnji s MC Srebrenica, a svemu je prethodila posjeta mezarju u Potočarima, gdje je učenjem Fatihe i polaganje cvijeća odata počast svim žrtava genocida.

Projekt koji organizuje i finansira Općina Ilidža



Trinaesta posjeta od 2008. godine

700 OSNOVACA S ILIDŽE U POSJETI POTOČARIMA

Učenici osmih razreda osnovnih škola s područja općine Ilidža 23. maja su posjetili Memorijalni centar Srebrenica - Potočari.

Više od 700 ilidžanskih osnovaca, koji su bili u pratnji svojih nastavnika, odalo je počast žrtvama genocida.

Od 2008. godine u organizaciji Općine Ilidža učenici osnovnih škola s područja Ilidže redovno posjećuju Memorijalni centar Srebrenica - Potočari, a najnovija posjeta Potočarima i Srebrenici bila je ukupno 13. koja je realizovana od 2008. godine. Izuzetak su 2020. i 2021. godina, kada posjeta MC-u nije bila moguća zbog pandemije koronavirusa. Sa posjetom, kroz ovaj humani i edukativni projekt koji organizuje i finansira Općina Ilidža, do sada je više od 9.000 učenika osnovnih škola sa područja općine Ilidža posjetilo Memorijalni centar u Potočarima.

Podršku u realizaciji odlaska ilidžanskih osnovaca u Memorijalni centar Srebrenica - Potočari Službi za obrazovanje, kulturu sport i mlade pružili su i MUP KS, MUP FBiH, DZ KS OJ Ilidža i GSS SK Ilidža.



Načelnik Muzur i Ševket Hafizović, predsjedavajući UO MC Srebrenica

Načelnik Muzur je naglasio kako je Općina Ilidža uvijek bila i ostat će uz Bošnjake - povratnike, te je pohvalio vrijedan rad mladih ljudi okupljenih oko Memorijalnog centra kroz istraživački rad, izložbe i sve ono što rade da se o genocidu u Srebrenici govori na osnovu činjenica i na osnovu istine.

Nastavljen uspješan projekt Općine iz 2021. godine

BESPLATNE ČLANARINE U BIBLIOTECI SARAJEVO



Učlanjenje se može ostvariti do 31. decembra 2022. godine

Načelnik Općine Ilidža, Nermin Muzur, i direktorica JU Biblioteka Sarajevo, Merima Lendo, potpisali su ugovor koji se odnosi na besplatne članarine u ovoj javnoj ustanovi za stanovnike općine Ilidža. I ove godine Općina Ilidža nastavila je s projektom koji se u 2021. godini ispostavio kao itekako uspješan za sve ljubitelje knjige s područja općine Ilidže.

Svi zainteresovani mogu se besplatno učlaniti u Pozajmnom odjeljenju Ilidža, koje se nalazi na adresi Hrasnička cesta 8 (nekadašnje Kino Igman), a za učlanjenje neophodna je CIPS prijava, lična karta za odrasle ili CIPS prijava za maloljetne osobe.

Pravo na besplatno učlanjenje građani i građanke Ilidže mogu ostvariti do 31. decembra 2022. godine, a moguć je besplatan upis maksimalno dvije osobe iz iste porodice.

Sve osobe koje nisu preuzele člansku kartu za 2021. godinu plaćenu budžetskim sredstvima Općine Ilidža, neće moći ostvariti pravo na besplatnu članarinu u ovoj godini.

Jedna od najvećih poslijeratnih akcija čišćenja i uređenja javnih površina na području općine Ilidža



Velika petodnevna akcija čišćenja i uređivanja javnih površina na teritoriji općine Ilidža uspješno je završena 3. juna.

U združenoj akciji, čiji je nosilac bilo Ministarstvo komunalne privrede, infrastrukture, prostornog uređenja, građenja i zaštite okoliša, učestvovali su Općina Ilidža, KJKP Park, KJKP Rad, KJKP Vodovod i kanalizacija, KJU za zaštićena prirodna područja Sarajevo, KJKP GRAS, JP Ilidža, Vatrogasnog društva Ilidža i KJKP Pokop.

Načelnik Općine Ilidža Nermin Muzur iskazao je zadovoljstvo akcijom koja je bila obimna, a kojom je obuhvaćeno svih 16 mjesnih zajednica općine Ilidža.

- Ovo je jedna od najvećih poslijeratnih akcija koja se desila na području općine Ilidža. Želim se zahvaliti resornom ministarstvu predvođenim ministrom Enverom Hadžiahmetovićem, svim kantonalnim javnim preduzećima koja su učestvovala u ovoj akciji, baš kao i našem Javnom preduzeću Ilidža. Ono što me posebno raduje jeste i da se veliki broj građana odazvao ovoj akciji - rekao je Muzur.

Načelnik Općine Ilidža je naglasio kako je izuzetno važno što je napravljena sinergija između kantonalnih preduzeća, odnosno Vlade Kantona Sarajevo, ministarstva, koje je nosilac i organizator ove velike akcije te lokalne zajednice i samog stanovništva.

- Uz redovno održavanje koje mi radimo kroz JP Ilidža i kroz neka kantonalna preduzeća ovakve akcije sigurno će dati dobre rezultate. Ono što nama preostaje da kroz razgovor sa građanima pokušamo razviti svijest kada je riječ o održavanju komunalne higijene i javnih površina, posebno zbog činjenice da je Ilidža puna zelenih oaza i da se dobar dio teritorije nalazi u vodozaštitnoj zoni - kazao je načelnik Općine Ilidža.

Muzur je naglasio kako bi dvije ovakve akcije na godišnjem nivou rezultirale da općina Ilidža izgleda puno bolje, ali i da su efekti akcije itekako vidljivi na terenu.

- Po prvi put su očišćeni tereni i lokacije koje nikad nisu čišćeni nakon završetka agresije na Bosnu i Hercegovinu. Moguće je i da je tokom obimne akcije u nekoj mjesnoj zajednici zaboravljen neki dio, mi smo tu na raspolaganju kroz naše Javno preduzeće i u narednih nekoliko dana ćemo završiti i te dijelove - poručio je Muzur.

Učinkom i efektima akcije bio je zadovoljan i Enver Hadžiahmetović, ministar komunalne privrede, infrastrukture, prostornog uređenja, građenja i zaštite okoliša.

- Ovo je prvi put jedan novi model koji smo usvojili, a to je da uz sve službe sa općinskog i kantonalnog nivoa, sa građanima, organizujemo jednu ovako veliku akciju. Ovo je prvi put da smo uspjeli prikupiti i odvući više od 150 tona različite vrste otpada, kabastog i mješovitog. Smatram da je ovo pravi način da građani ali i lokalna zajednica budu zadovoljni, a naravno i mi u Vladi KS jer nam je svima u interesu da imamo čist grad - rekao je ministar Enver Hadžiahmetović, te naglasio:

- Ilidža je specifična jer je velika površina i ona je turistička destinacija. Zbog upitne kapacitiranost preduzeća koje održavaju Ilidžu odlučili smo se na jednu zajedničku akciju. Osim toga ovo je i poruka građanima da svi moramo voditi računa o zaštiti okoline i čistoći.

Petodnevna akcija čišćenja okončana je u Mjesnoj zajednici Ilidža Centar, a za sve radnike i učesnike akcije Općina Ilidža organizovala je druženje uz roštilj. Tom prilikom načelnik Muzur je svim preduzećima uručio zahvalnice za doprinos i učešće u velikoj akciji.

Obilježena 30. godišnjice od poznate akcije kao i Dan Mjesne zajednice Rakovica

U RAKOVICI PAMTE POKUŠAJ DEBLOKADE

U organizaciji Udruženja boraca "Veterani rata 1992. - 1995. Rakovica" na Ilidži je obilježena 30. godišnjica "Akcije pokušaj deblokade Rakovice", koja je ujedno i Dan MZ Rakovica.

Kroz prigodan historijski čas, prisutni su se prisjetili dešavanja iz 6. juna 1992. godine, te su učenjem Fatihe i polaganjem cvijeća na spomen-obilježju pred džamijom u Rakovici odali počast svim šehidima s ovog područja, ali i njihovim saborcima koji su preminuli nakon agresije na BiH.

Učenici Devete osnovne škole svojim muzičkim izvedbama i recitalima uveličali su sjećanje na dešavanja od prije tri decenije.

- Uvijek kažem da je teško govoriti na mjestima gdje se prisjećamo naših najhrabrijih sinova i kćeri. Ipak, moram priznati da mi je drago što na tim obilježavanjima vidim djecu iz naših osnovnih škola kako kroz svoje muzičke izvedbe i nastupe čuvaju sjećanje na sve one kojih više nema, a koji su nama



Učenici Devete osnovne škole priredili muzičke izvedbe i recitale

omogućili da ovdje stojimo i govorimo - rekao je načelnik Muzur.

Pored delegacije Općine Ilidža, počast šehidima Rakovice odale su Koordinacija boračkih udruženja, MZ Rakovica, Udruženje Deveta brdska Hadžići, Udruženja branilaca BiH - općine Kiseljak kao i brojni stanovnici Rakovice.

Nastavljeni radovi na poboljšanju sportske infrastrukture na području općine Ilidža

PRIPREMA ZA REFLEKTORE U HRASNICI



Najmoderniji teren s umjetnom podlogom u Kantonu Sarajevo

Određenim korekcijama oko novoizgrađenog terena s umjetnom travom, koji je jedan od najboljih u Bosni i Hercegovini, a sasvim sigurno najbolji u Kantonu Sarajevo, nastavljeni su radovi na uređenju Sportskog centra Hrasnica.

Na ovaj način izvršene su pripreme za nastavak radova oko terena, te u narednoj fazi slijedi postavljanje ograde, a potom i instaliranje reflektora.

Pored radova na terenu s umjetnom podlogom Sportskog centra u Hrasnici, u pripremi su još četiri igrališta raspoređena po mjesnim zajednicama, kao i rekonstrukcija nekih od postojećih terena, a zatim i veliki Sportsko-rekreativni centar na obali rijeke Željeznice, na tromeđi Butmira, Sokolović Kolonije i centra Ilidže.

Sjećanje na legendarnu bitku obilježava se i kao Dan Mjesne zajednice Donji Kotorac

30 GODINA OD ODBRANE DONJEG KOTORCA

U Butmiru i Donjem Kotorcu učenjem Fatihe i polaganjem cvijeća okupljeni su obilježili 30. godišnjicu od prvog napada na Donji Kotorac, koji su agresorske snage izvele 13. juna 1992. godine, a koji se obilježava i kao Dan Mjesne zajednice Donji Kotorac.

Prije tačno 30 godina agresori su s nekoliko tenkova i transportera provalili ogradu Međunarodnog aerodroma Sarajevo, te su se pozicionirali u Donjem Kotorcu u želji da ovo naselje odsjeku od Butmira.

Veliku hrabrost tog dana iskazali su Nedžad Delić i Bajram Hasanović, koji su protuoklopnim sredstvima uspjeli osujetiti četnički napad. Nažalost, nakon što je zoljom pogodio transporter, a svežanj bombi bacio pod tenk, Delić je poginuo od snajperskog hica. Hasanović je osom gađao drugi tenk, ali neuspješno. Uprkos promašaju, agresori su shvatili da branioci Donjeg Kotorca raspolažu protuoklopnim sredstvima zbog čega odustaju od napada na ovo naselje sve do marta 1993. godine.

- Treba njegovati sjećanje na sve odsutne bitke tokom agresije



Prigodan program učenika Osme osnovne škole "Amer Čenanović"

koji su se odvijale na području općine Ilidža. Drago mi je što na obilježavanjima sada vidim unuke onih koji su bili učesnici ovih događaja - kazao je Nermin Muzur, načelnik Općine Ilidža.

Osim delegacije Općine, počast šehidima i poginulim borcima odale su njihove porodice, prijatelji, komšije, predstavnici boračkih udruženja i političkih partija.

Spektakularno otvaranje obnovljenog izletišta Stojčevac i turističke sezone u Kantonu Sarajevo

KONCERT HARIJA MATA HARIJA I TRKU POSJETILO VIŠE OD 20.000 LJUDI



Fantastična atmosfera na poznatom sarajevskom izletištu

Humanitarnom trkom Stojčevac 5K u kojoj je učestvovalo više od 500 trkača, a potom i spektakularnim koncertom Harija Mata Harija, 25. juna otvoreno je obnovljeno izletišta Stojčevac, koje je tog dana posjetilo više od 20.000 ljudi.

Trka, koja je bila dio sportsko-zabavne manifestacije, kojom je otvorena i ljetna turistička sezona u Kantonu Sarajevo uprkos humanitarnom karakteru privukla je veliki interes, a prema broju trkača ponijela je i titulu najmasovnije 5K trke ikada održane u Bosni i Hercegovini.

U muškoj konkurenciji trijumfovao je Emir Hastor (16:02), drugi je bio Mustafa Jamak (16:29), a treći Zaim Šuman (17:00). Najbrža trkačica bila je Amela Trožić (19:43), drugo mjesto osvojila je Irina Aniechkina (23:37), a treću poziciju zauzela je Amela Tuzlak (24:12).

Osim dvoje najbržih u obje konkurencije, nagrađeni su najmlađi i najstariji učesnik, a nagrade su dodijelili načelnik Općine Ilidža, Nermin Muzur, i predsjedavajući Općinskog vijeća Ilidža, Tarik Stambolić.



Najmasovnija 5K trka u Bosni i Hercegovini ikada

Novac prikupljen od uplaćenih startnina za učešće u trci (4.280 KM) doniran je udruženjima s područja općine Ilidža koja se kroz svoje djelovanje i programske aktivnosti bave radom sa djecom s poteškoćama u razvoju.

Šlag na trku koja je imala 358 finišera bio je spektakularan koncert Harija Mata Harija u jedinstvenom ambijentu Stojčevca, a načelnik Muzur je kazao kako će obnovljeno izletišta svake naredne godine nuditi jedinstvene sadržaje svojim posjetiocima.



Načelnik Muzur i predsjedavajući Stambolić sa pobjednicima

- Stojčevac je posjetilo više od 20.000 hiljada ljudi koji su prvo uživali u do sad najmasovnijoj trci ovog tipa Stojčevac 5K, a onda u spektakularnom koncertu našeg Harija Mata Harija. Dokazali smo da ima mjesta za sve, za najstarije, kao i za najmlađe, da imaju svoj kutak i oni koji žele da sjede i sa strane uživaju u prirodnom ambijentu, kao i oni koji žele da se takmiče, trče utrke ili žele da plešu i uživaju uz hitove Harija. Niko nikom nije smetao, hvala Bogu nije bilo niti najmanje povrede na trci, kao ni najmanjeg incidenta na samom koncertu - rekao je načelnik Općine Ilidža, Nermin Muzur, te dodao:

- Trebalo je više od 27 godina da zasja Stojčevac, trebalo je više od 27 godina da na Stojčevcu imamo jednu trku i trebalo je više od 27 godina da na Stojčevcu imamo koncert. Planirajte da ćemo se svake godine skupljati ovdje te dijeliti pozitivnu i dobru atmosferu i uživati u našem Stojčevcu.

Odličnu energiju Hari Mata Hari je kroz svoje najveće hitove uspio prenijeti i na publiku, a ni kratka kiša nije uspjela narušiti sjajnu atmosferu koja je u subotu navečer vladala na Stojčevcu.

Sadržaj kakav do sada nije postojao na teritoriji naše lokalne zajednice

ILIDŽA DOBIJA MODERNI PARK ZA MLADE

Na lokaciji gdje graniče mjesne zajednice Butmir, Sokolović Kolonija, Ilidža Centar i Lužani gradi se najveći sportsko-rekreativni park na području općine Ilidža, sadržaj kakav do sada Ilidža nije imala.

U velikom sportsko-rekreativnom parku, koji će biti smješten na 12.000 kvadratnih metara, kakav je nedostajao našoj lokalnoj zajednici, mladi će moći uživati u terenima za kolektivne loptaške sportove (rukomet, košarka, odbojka i mali fudbal). Tri igrališta s adekvatnim mobilijarom najmlađim stanovnicima Ilidže ponudit će mjesto za sigurnu igru i dobru zabavu.

Oko cijelog parka bit će uređena staza za trčanje, uz dodatni prostor koji će se moći koristiti za treninge na otvorenom.

- Kada smo krenuli u revitalizaciju Stojčevca nisu nas shvaćali ozbiljno, možda mnogi i sada slično razmišljaju, ali naša glavna



Sportsko-rekreativni park smješten na 12.000 kvadratnih metara

vodilja je da Ilidžu mijenjamo nabolje - kazao je načelnik Općine Ilidža, Nermin Muzur.

U sportskoj dvorani "Sabit Hadžić" na Ilidži



Općina Ilidža pomogla u realizaciji takmičenja

TAKMIČENJA OSNOVACA U ODOJCI I RUKOMETU

U sportskoj dvorani "Sabit Hadžić" održana je završnica općinskog takmičenja osnovnih škola u timskim sportovima, a koje je realizovano uz pomoć Općine Ilidža.

Zbog činjenice da na Ilidži trenutno djeluju četiri kluba sa statusom premijerligaša (ŽOK Igman, OK Ilidža, ŽRK Ilidža, OKK Spars Ilidža) ranije je donesena odluka da će se učenici osnovnih škola nadmetati u odbojci i rukometu, a sve kao vid omasovljenja omladinskih pogona ilidžanskih premijerligaša.

U muškoj konkurenciji prvo mjesto u odbojci osvojili su učenici Desete osnovne škole. Srebrna medalja pripala je Drugoj osnovnoj školi, dok je Prva osnovna škola (I) zauzela treću poziciju.

Učenice Desete osnovne škole pokazale su najviše i s pravom osvojile pobjednički pehar u rukometu. Drugo mjesto zauzela je Četvrta osnovna škola, a Prva osnovna škola (II) osvojila je treću poziciju.

Nagrade najboljim ekipama i pojedincima dodijelili su direktor JU Kulturno sportski i rekreacioni centar Ilidža, Haris Topalović, i koordinator za sport u JU KSIRC Ilidža i vijećnik OV Ilidža, Amel Pintol.

Sjećanje na Josipa Škiju Katalinskog

JEDANAEST GODINA OD SMRTI NAŠE LEGENDE



Grobница porodice Katalinski

Pokojni Josip Škija Katalinski jedan je od onih koji su pronijeli slavu Ilidže i ilidžanskog sporta širom svijeta.

Našoj legendi nikad nije smetalo to što je Ilidžanac već sasvim suprotno, s ponosom je isticao to što je s Ilidže.

Ilidža je uduvijek bila njegova, a on naš - Ilidžin. Legendarni fudbaler Igmana, Željezničara i francuske Nice nije zaboravljen ni 11 godina nakon njegove smrti.

Delegacija Općine Ilidža predvođena načelnikom Nerminom Muzurom, predsjedavajućim Općinskog vijeća Tarikom Stambolićem i njegovim zamjenikom Redžom Lemezanom posjetila je na Stupu porodičnu grobnicu porodice Katalinski, položila cvijeća i tako odala počast najboljem ilidžanskom fudbaleru.

Pokojnog Škiju ne treba posebno predstavljati, ali nije zgoreg napomenuti da je u sezoni 1971/1972 sa Željom osvojio titulu prvaka SRF Jugoslavije, a u dresu tima s Grbavice odigrao je više od 350 utakmica.

Za reprezentaciju s kojom je igrao i na SP 1974. godine upisao je 41 nastup i postigao deset golova.

Načelnik Muzur potpisao Sporazum s direktoricom Pete osnovne škole

OPREMANJE KABINETA INFORMATIKE

Načelnik Općine Ilidža Nermin Muzur potpisao je Sporazum s direktoricom Pete osnovne škole, Elvirom Hrustanović, kroz koji će Općina Ilidža u ovoj javnoj ustanovi finansirati opremanje kabineta za nastavni predmet Informatika.

- Ovim želimo jasno pokazati da je ulaganje u mlade i njihovo obrazovanje jedno od naših osnovnih opredjeljenja - kazao je načelnik Muzur, te dodao:

- Kroz ovaj Sporazum Općina Ilidža će finansijski pomoći opremanje kabineta Informatike, a sve kako bi učenicima osnovne škole u Sokolović Koloniji omogućili da što lakše, bolje i kvalitetnije izučavaju predmet koji je postao jedan od osnova funkcionisanja modernog društva.

Općina je u proteklom periodu kroz različite aktivnosti i programe pomagala osnovne i srednje škole na teritoriji Ilidže, a prema riječima načelnika Muzura s ovakvim programima će i nastaviti.



Načelnik Muzur i direktorica Hrustanović

U ime kolektiva i učenika JU Peta osnovna škola Ilidža direktorica Hrustanović se iskreno zahvalila načelniku Muzuru i Općini Ilidža na podršci u poboljšavanju uslova za izvođenje nastavnog procesa, dok je načelnik Muzur i ovom prilikom pohvalio učenike ove škole zbog redovnog učešća u obilježavanju bitnih datuma za Ilidžu ali i Bosnu i Hercegovinu.

Nastavljena podrška razvoju primarne poljoprivredne proizvodnje na području Ilidže

OPĆINA DODIJELILA 29 PLASTENIKA



Plastenici površine 50 i 100 metara kvadratnih

Realizacijom projekta, kroz koji je dodijeljeno 16 plastenika površine 50 i 13 plastenika površine 100 m², nastavljena je podrška Općine Ilidža razvoju primarne poljoprivredne proizvodnje na području naše lokalne zajednice.

- Za Javni poziv za ostvarivanje prava na dodjelu plastenika s dodatnom opremom uvijek postoji veliki interes, što me posebno raduje. Ipak, prema uslovima i kriterijima odabrani su oni najbolji i čestitam na tome. Nadam da će maksimalno iskoristiti plastenike koje su dobili - rekao je Nermin Muzur, načelnik Općine Ilidža, nakon potpisa 29 ugovora o dodjeli 29 plastenika s dodatnom opremom.

Načelnik Muzur je naglasio kako će Općina Ilidža i u budućnosti nastaviti s realizacijom sličnih programa koji imaju perspektivu.

Inicijativa sa 15. redovne sjednice OV Ilidža koja se odnosi na učenike od prvog do četvrtog razreda

BESPLATNE KNJIGE ZA OSNOVCE NA ILIDŽI

Na 15. redovnoj sjednici Općinskog vijeća Ilidža, koja je održana 23. juna, upućena je inicijativa kojom se od Općine Ilidža traži da izdvoji sredstva kako bi se učenicima od prvog do četvrtog razreda ilidžanskih osnovnih škola osigurali besplatni udžbenici za narednu školsku godinu.

Sama po sebi, inicijativa koju je podnio vijećnik Tarik Čenanović (Narod i Pravda) nametnula se kao posve logična nakon najnovije odluke Vlade Kantona Sarajevo o besplatnim udžbenicima za učenike osnovnih škola od petog do devetog razreda.

- Iako iziskuje određene promjene, potrudit ćemo se da se kroz raspodjele u Budžetu Općine Ilidže za 2022. godinu ova kvalitetna inicijativa i realizuje - rekao je Nermin Muzur, načelnik Općine Ilidža, dodavši:

- Ovom inicijativom jasno smo pokazali naše opredjeljenje da ulažemo u obrazovanje najmlađih članova naše zajednice, u našu budućnost i da "podrška mladima" iz "Našeg plana za Ilidžu



Inicijativa iziskuje određene promjene i raspodjele u Budžetu

2020. - 2024." nije tek mrtvo slovo na papiru, već da smo spremni sprovesti u djelo ono što smo govorili.

Načelnik Muzur je istakao da Općina Ilidža na ovaj način nastoji, barem jednim dijelom, ublažiti roditeljske brige kada je riječ o obrazovanju djece, a nada se da će i druge lokalne zajednice pratiti ovaj odlučan potez Općine Ilidža i Općinskog vijeća Ilidža.




**Osnovna škola
Stup**



**Tramvajska pruga
Ilidža - Hrasnica**



**Sportska dvorana
Hrasnica**



**Veliki
park**




**Termalni
bazeni**



**Sportsko-rekreacioni
centar za djecu i mlade**




**Trg
"Sabit Hadžić"**



**Kružni tok
"Idu dani"**



**Uređenje centralnog
dijela Ilidže**



**Ratni put
preko Igmana**



**Rekonstrukcija
Stojčevca**



**Obnova
premijera**